

8403/82 (1-10)

5

BRADDOCK
NOV 3 1863

HARVARD-YENCHING LIBRARY
HARVARD UNIVERSITY
2 DIVINITY AVENUE
GHIAOLIU

NOV 3 1967

太師誠意伯劉文成公集卷之七

東嘉裔孫歲貢生標孤嶼元奇重梓

銘

尊聞堂銘

皇降恒德我儀受之情牽物交民鮮克有之卓彼聖哲有開
于先弘猷秩昭績緒維賢凡有所聞恭敬奉持造次必將屋
漏勿欺洋洋鬼神兢兢震霆寢斯食斯或敢弗承厥聞伊何
闕疑擇善靡聖天只克念不遠人亦有聞罔知所擇楊墨仁
義乃德之賊亦既擇止罔知所尊郭公善善國喪身奔聞義
必爲聞過必徙能尊能行是謂君子戴生有堂扁曰尊聞用

哈佛大學
圖書館
藏印

宏厥理昭以銘文

敬齋銘 并序

敬齋者篤列圖彥誠所以名其居室也彥誠以科第發身其於敬字之義蓋亦講之熟矣則舉其所知而行焉可也又何必多求乎人之言哉乃勉而爲之銘銘曰
莊其外而肅其內瓊琚玉佩無顯無昧惟鬼神是對肆過斷弗愼以不越載以永無有悔

奎上人耘杖銘

奎上人得古藤以爲杖而置鋤焉將以兩其用也名之曰耘杖而劉基爲之銘曰

醫可以取魚而不可以繫駕帶可以繫襦而不可以貫珠孰眇其癯而多乃需旣予老是扶又歲葬之除俾康勿起以弗逃厥塗杖乎杖乎歲月逝夫子也予俱

朱伯言硯銘

器而容旣澤旣礪俾椎以爲鋒克相予工厥惟爾庸予所弗工維予之恹恹式蠹沒以攻無貽爾悽

紹興能仁寺鍾銘 并序

嬾翁禪師旣住大能仁寺之明年新鑄大鐘成枯蒼劉基銘之曰

赤堇之金耶溪之銅弗鈔弗鋒而以爲吾鍾撻之錚錚靡幽

誠意作文集
卷之七
不通以暢八風闢陰闢陽式贊化功於萬億年與皇家相爲
無窮

醒齋銘

并序

醒齋者遠君德芳所以自名其居室也遠君少嗜酒數爲
酒所困一旦忽思古人之所以喪其身覆其家者大率多
於酒遂絕旨酒而以醒齋署其居用以朝夕警省而杜其
欲於將萌也栝蒼劉基聞而喜其善修慝也故爲之銘使
揭于楣且以堅其志銘曰

禹疏儀狄祇承虞帝湯做酣歌用永厥世維衛武公初筵有
詩年踰九十令聞不墜在魯仲尼酒不及亂範模萬古愈久

彌粲羲和酒滌胤后徂征楚國皆醉鄢郢榛荆次公北闕仲
孺東市狂談酌罵身戮家毀吾以是知昭昭生于惺惺而憤
憤出于冥冥劉曜受執孔融被刑莫不因此以殘其形古稱
覆轍後車勿蹈有縱弗防禍生所好人孰無過弗改維咎知
過而改何過之有維敬與怠狂哲攸分敬醒則存不醒則昏
於嗟遠君以我諄諄止爾醺醺有苗弗芸視此銘文

玉兔泉銘

并序

自古有以勢軋天下箝人口使和已者鮮不由細微以及
大此姦人之素能也故高之馬莽之祥瑞惟其言而莫之
違然後大詐行而大欲得矣秦檜之事宋高宗也以岳將

軍之武之忠且排搆之殺其身以及其子反以爲功而宋
之君臣莫不從其指則亦何求而不得哉玉兔之泉以清
美爲建業城中第一豈昔顯而今堙者檜實知之耶或有
善察土脉工穿井之術者密以語檜而神之以白兔耶則
皆不可知也夫檜之罔民設詐豈下於高莽哉白兔之是
非無關天下之大事是故賢人君子忽之而莫與較於是
乎鄙夫諂子遂探其意而夸之以爲佞是蓋不足辯也金
華張孟兼憫泉之芳潔爲姦人所污而銘以雪其冤愛物
之良心也予亦悲之爲之作後玉兔泉銘銘曰
嗚呼泉乎夫何辜爲檜所污世無吳隱之孰昭其誣嗚呼泉

乎尼父大聖猶言其主瘠環與癰疽白兔之傳夫何傷於爾
歟檜死爲蛆泉潔自如我作銘詩衆惑斯祛嗚呼泉乎終古
弗渝

王原實裕齋銘

會稽王原實裕名其齋楛蒼劉基爲之銘曰

寬而舒綽綽乎有餘佩裾與與有容弗据德人之間過者式
諸

頌

梅頌 并序

吳興章仲文築室花谿之上環植梅焉命之曰梅花之莊

子與仲文交敬其好學而知德也知其有取於物不徒矣
乃效屈子頌橘之體而作頌曰

朱方之秀梅實碩兮含章而貞受命獨兮扶疎蕭森清以直
兮玄冰沍寒不撓其節兮玉之潔兮爨之特兮閉而發兮芳
郁烈兮黃中絳跗美而完兮麗而不淫物莫能干兮冬榮夏
實含陰陽兮青黃纍離以和羹兮文質彬彬德之儀兮君子
之象君子之宜兮

箴

順齋箴爲夏仲珍作

二儀茫茫繫理是物判以兩途維逆與順理之所在漠乎無

形曷予求之卽事以明利劍吹毛不柄之持比轅適粵徒勞
何爲堯舜理物因利除惡鯀堙洪水燹倫攸斃勢順則強氣
順則舒天地順動百度弗渝待時而行處順以守君子作箴
敢告左右

守口如瓶箴

吳君以時書守口如瓶以自警徵予言爲作箴曰

維人有口瓶亦有口瓶口弗守喪厥受人口弗守速厥咎口
乎口乎其禍福之門而一身之樞紐乎人有瓶也尚克固之
胡然有口而不知度之維言如泉維口如隄有出弗稽爲河
爲谿激石揚泥追不可回故曰好言自口莠言自口又曰君

子無易由言耳屬于垣守口如瓶永矢勿諼

敬齋箴 并序

蒙古氏宗道之先出自山西而以儒世其家故名其燕居之室曰敬齋載世德也先正有言曰經禮三百曲禮三千一言以蔽之曰毋不敬敬也者其萬事之根本與故聖人之語君子惟曰修己以敬故禹湯以克敬而王桀紂以不敬而亡自天子至于庶人豈有異哉故曰穆穆文王於緝熙敬止又曰昊天曰明及爾出王昊天曰旦及爾游衍敬也者不可須臾離也宗道勉乎哉克念作聖敬而已矣作敬齋箴其詞曰

心敬則存而不敬則昏事敬則立而不敬則跲克臧自我否臧自我如之何以可維謚維專式莊弗儼臧之淵淵出之虔虔俾中不偏有握勿捐旣悠旣堅無不顯或愆無息弗乾熟之者聖守之者賢故曰敬勝則吉怠勝則滅敬而無失聰明睿智皆由此出事神治民舍是無術是用作箴以謹燕昵

官箴上

維天生民儻儻蚩蚩有欲罔制乃豹乃螭爰立之君載作之師式養式教母汨秉彜嗟爾司牧代君撫綏君祿我食君令我施邦本弗固庶事成墮受寄匪輶敢不肅祇治民奚先字之以慈有頑弗迪警之以威振惰獎勤拯艱息疲疾病顛連

我扶我持禁暴戢姦損羸益虧如農植苗早夜孜孜澇疏旱
溉無容稗秕如良執輿順以導之無俾旋濘彊策以馳慈匪
予愛帝命溥時威匪予憎國有恒規弱不可陵愚不可欺剛
不可畏媚不可隨無取我便真人于危無避我謗見義不爲
天鑒孔昭民各有思惠之斯懷推之乃離譽不可驕器惡滿
歆謗不可怒退省吾私人有恒言視民如兒無反厥好以暴
予知是用作箴敢告執羈

官箴中

在昔隆古分封國都付之以民俾養勿瘠上下協心各保乃
區明庶考績昭哉範模秦廢聖制代德以徂刀筆之權始歸

吏胥玩法舞文聾癡瞽愚流波至今一任簿書行立公庭如
雁如鳧我欲是求我利是趨摩揣官情以逞覬覦官惟好貨
我甘以莛官惟好名我逢以諛官惟畏嫌我疑以汙官惟好
情我濫以誤官惟好猜惑以多途官惟好威道以掎摭語默
有爲俯仰有須覘容察辭助忿乘愉法度盈口奸邪滿軀蠱
智迷昧欺庸陷迂俾好作惡以紫爲朱未獲官心嫗嫗儒儒
亦旣獲止如登天衢傲兀民士憑陵里閭惡積禍來官與之
俱人有恒言遇吏如奴堅防固隄猶恐或窬矧日聽之百姓
何辜是用作箴敢告僕夫

官箴下

無謂余明人莫能昧離婁善察不識其背無謂予能人莫敢欺校人烹魚子產弗知立事惟公燭詐惟誠小節勿固小慧勿行無矜我廉守所當爲無沽我名以生衆疑何以簡訟決之使通何以弭貪慎檢乃躬去讒斥佞遠吏近民待人以寬律己以勤無咎人弗信忱至斯孚無患人不聞惟德不孤德以進善威以挫姦德不可偏威不可煩無謂彼富我必極之無謂彼貧我必直之持心如衡以理爲平無爲避嫌以縱無情人有恒言爲臣不易是用作箴敢告有位

贊

靈峰寺植木贊

靈峰寺有松杏與樸並植焉劉子見而感之爲作贊曰
杏葉葱芊有子可以實邊松枝扶疎有苓可以引年樸狀如
檇衆蠹所穿擁腫液瞞不可以鑄胡並植于庭混厥醜妍明
堂求材般趨爾先松戕杏割樸獨宛然嗚呼樸乎孰女之憐
維女之全抑棄於人乃獲乎天耶

畫龍贊

觚其角蒼其鱗蚘蚪其身胡爲乎而神至陽之精健與天倫
形而求之惡識其真于嗟龍兮

碑銘

北嶺將軍廟碑

諸暨東北百里爲蕭山縣其山曰北幹之山浙水帶其陰湘湖匯其陽東望會稽至于大海日之所出其上爲星紀婺女之辰故其神爲甚靈能祛疫癘作雲雨人有所祈必應故立廟于其山尊其神曰北嶺將軍歲時祠焉宋徽宗時方臘反睦州自睦入杭具舟將渡江吏民大怖相率禱于神比寇至卽有風逆其舟且見甲士列岸上甚衆乃止不敢渡寇平知越州劉幹上其事于朝賜額曰武佑廟後封顯應侯再封靈順顯應侯有元至正十二年妖賊入江浙行省烽火通于蕭山百姓驚竄市井皆空主簿趙君某至縣甫八日卽自往西與募民備禦而江上守兵甚寡弱無賴子競起爲劫且應賊

衆洵懼君詣廟卜于神神許之吉衆心稍安君乃分遣人捕無賴子爲劫者悉誅之有自賊中來言賊欲遣兵攻浙東見江岸列甲卒旗幟如睦寇欲渡時以故畏憚無東心及賊退邑人皆德趙君趙君曰吁茲惟神之功予何庸焉明年夏大旱君往禱又輒得雨衆益信神之靈而大敬趙君之能以誠感神也廟在山之岡歲久朽壞惟神所居室獨存君每至廟謁念無以報神貺乃以其俸錢作新廟邑人亦大喜爭致助焉十有五年春廟成爲堂三間三門兩廊像設器用無所不備惟所獨存堂仍其舊繚以垣墉甃以瓦石植以嘉木丹堊輝映吏民趨走承禮益肅以虔時三月壬寅予自杭還越過

蕭山而廟適成故趙君請予記按祭法有能禦大災捍大患
則祀之今神能降雨澤蘓枯槁又能陰力卻賊以能保全其
民物所謂禦災捍患孰有大於是哉廟而祀之誰曰不宜趙
君能愛其民故能以敬事神而獲其佑可尚也矣予故喜而
爲序其事復爲之歌俾祀神焉其詞曰青山兮幽幽綠蘿含
烟兮樹木稠望夫君兮悵悠悠巖阿寂寥兮使我心愁雷爲
車兮雲爲馬輕霞動兮江色赭神之來兮風振野吹竹兮彈
絲女巫舞兮紛陸離奠芳醴兮薦潔粢畱靈修兮牢純禧驅
魃蜚兮逐狼虎弭毒沴兮時暘雨禾麻成兮息桴鼓物旣備
兮禮無愆和熙洽兮洞淵玄爲城爲堡兮式恒且堅保佑我
民兮樂以永年

嘉興路重修陸宣公書院碑銘

士有以一身任社稷之安危一言廻天下之趨嚮蓋其智足
以識事機其誠足以動人心故能出入危邦扶持庸君寵之
而不阿違之而弗懲知有國而不知有其身若是真可謂大
臣哉孔子稱大臣以道事君不可則止其或先蒙君之知而
期盡心以報効知禍而不避知難而不止若唐陸宣公者其
去就雖殊而其揆一也孔子曰篤信好學守死善道宣公以
之吾常怪唐德宗以猜防小智行多欲之私信讒邪如心膂
視貨賄爲性命臨患難則姑息一施處安佚則嫌疑百出以

致藩臣叛命士卒離心播遷困厄而卒不亡及觀唐史稱其
出居艱阻之時謀猷參決一出于公又稱奉天所下詔書雖
武夫悍卒無不流涕多公所爲然後知其得人以扶持也昔
者隨有季梁不滅于楚衛成公有甯武子不死于晉無競維
人不然殆哉况公之言德宗不盡用也而僅用其一二猶足
以轉危爲安易敗爲功使其能舉國以聽公周宣漢光不難
繼矣惜乎其中信用群小而棄公也公歿而奏議行於天下
今天下之言時務論政事者莫不宗之然則公之志雖蹙屈
于一時而終伸於萬世公之言雖不能以寤時君而足以淑
後人則亦可以無憾矣夫公浙西之嘉興人嘉興郡學舊有

公祠其詳見于呂公祖謙之記而郡城之東鴛鴦湖上又有
宣公書院其地有橋曰宣公橋故老相傳宣公實生于此故
於此立祠以祀公至宋景定癸亥始以祠堂爲書院丙子之
歲書院延燎于兵而公像故存衆白郡迎置于太初堂因以
堂爲書院大德九年濟南趙魯爲山長病其簡陋始改作之
其詳見于牟公獻之記自是城東故址遂廢爲墟泰定中有
僧賄學官請佃而建庵焉後至元二年庵災地復于書院是
歲六月其僧復賄有司剏庵如故山長雖爭之弗能得也至
正十四年宣徽院判海岱劉公貞受命爲嘉興路總管至則
首治學校之闕顧書院陋且朽欲新之而址隘弗稱乃用推

誠意伯文集
官方君道壑言命所司督其僧撤庵歸地復建書院其中爲
先聖廟兩廡儀門東西禮亭靈星之門具其西爲宣公祠祠
西爲室東鄉以祀郡之先賢其外爲三門廟東爲講堂其前
軒仍舊扁曰仁義之堂以藏宣公奏議謂其言無非仁義也
西齋以延師教弟子又增買蕩地若干畝以益廩膳庖厨倉
溷各得其所將成而公改除海道萬戶於是以屬之方君方
君力贊成之經始于至正十四年四月竣事于十五年二月
董其役者嘉興縣丞善慶路吏施淵顧選及前山長王玘任
奔走者直學張惟仁學吏沈雋也旣成使請記于劉基惟孔
子明王道以教萬世宣公學孔子者也故其術業一本王道

昔人以宣公祠爲書院有以也夫劉公用方君言撤浮屠以
復書院可謂能排異端植正道者有功於世教矣於是乎序
而銘之曰孔子太聖不遇于時旣沒之後爲萬世師宣公大
賢忠而見疑降及異代人以爲規有德無位用無所施用而
弗信惟禍之隨詭遇有獲君子弗爲身黜道光雖止不隳郡
守孔良百廢咸支爰崇其宮又嚴乃祠俾民觀者式是令儀
勿替後人尚永無虧

墓誌銘

劉顯仁墓誌銘

至正八年予初寓臨安交友未盡識也求士於天台陶中立

得四明劉顯仁焉與之交侃侃如也時杭學教導職廢不擇有學行輒介有權力者或以賄營爲之旣弗稱皆惶懼自退郡因令教官選文學之士不奔競者具禮往致聘顯仁與焉顯仁曰吾心實不樂爲此今郡守以禮招予予當爲斯文一出然不能久也居數月竟以父病辭去明年乃以詩經領鄉貢弗偶于春官歸侍父館海寧州賈希賢之義塾明年七月得暘疾疾二十日卒且卒無他言惟以父老弗克養爲恨顯仁名子青家世居四明之黃甘里曾祖諱三聘祖諱圖南仕宋爲秘書校勘官父名景元讀書作文爲鄉先生母舒氏娶史氏無子先顯仁五年卒顯仁旣卒乃以鄉貢進士除書院

山長顯仁生於某年某月某日卒於某年某月某日有詩文若干篇顯仁家甚貧而性耿介寡所與交其平生之最相知者陶凱中立賈執中希賢及基是爲銘銘曰
行成而不詭學成而不及仕猶有老父而無弱子嗚呼其死自古有此命也匪咎

海寧應和卿墓誌銘

四明劉顯仁病篤遺言于其叔父景儀以其友人應和卿之墓俾求銘于劉基曰先生知予心信予言且無妄許可於人其爲言必當垂於後應君長者生與予交沒予不得誌必屬之先生先生當不我遺以不朽我友我其無憾矣夫明日顯

仁卒景儀來致其言嗚呼以顯仁之才之德予方期其用于世以澤夫人乃弗克遂以死痛何如哉尚忍銘其友之墓雖然不可辭也遂涕泣而銘之謹按君姓應氏聞禮其名而和卿其字也應與邗晉同本於周武王之穆後因國爲氏有二璉者以文章名于漢魏君之所自出也今杭之屬州曰海寧鄉曰長平里曰黃岡君之所居也曾祖某祖某父某君之世也鄔氏君之母也沈氏君之妻也曰元亨文彬元善君之子也妙靖適郭某君之女也曰擇曰某某君之孫也幼失母氏育于祖母周以成人君之命于天也勤于田儉于家孝于親睦于隣不角勢以陵人君之修于身也故宋咸淳甲戌二月二十有二日君生之辰也有元至正辛卯五月四月君卒之日也四百六十有五甲子君之壽也海寧州長平里之草營岡君之墓也至正辛卯某月某日葬之日也銘之者栝蒼劉基也銘曰

彼夸之頤聲騰毀隨此逐之足視忽趾觸弗逐弗夸孰或予加不天其夫復何嗟

紫虛觀道士吳梅澗墓誌銘

栝有高士吳先生諱自福字梅澗舊爲吳興人其先評事公感因仕家于栝其子孫遂爲栝人五世祖安國故宋釋褐第二人歷官至太常少卿使金國不屈節高祖挺承節郎安撫

使司將領復使金國曾祖嗣英迪功郎祖有光父良之皆不仕先生生而敏慧好清淨不從群兒嬉父母甚器異之謂其有仙風道骨稍長遂命入紫虛觀從葉邦彥先生爲道士讀道德黃庭咸通其大旨及長德行愈著自達官貴人以至于市里細民無不敬愛天師正一真人聞其名授號崇德清修凝妙法師玄教宗師亦昇號教門高士金闌紫衣主領觀事先是觀燬于兵繼作極草率及先生領事乃重修三清殿建藏室新作山門旣成復建通明寶閣以祇奉昊天上帝其下爲演法堂於是觀宇粲新山水爲之增氣先生之力也先生性孝友能愛人觀去其居半舍二親在時必日親觀省奉甘

旨不匱親沒喪葬皆如禮與其兄相游處每眷眷不忍舍二弟早死則撫育其孤周恤其空乏無少間其兄之二子能讀書則蚤夜勉之曰吾家世簪纓更值時變門戶寢衰吾已委身方外不復能力學以續先緒其責實在女女惟勿懈尚克遂吾願旣而世昌中乙亥鄉貢世德中丁亥乙榜如先生志焉先生又自名其室曰知止客至輒邀坐具酒食不極歡不已同門陳樵隱老病先生躬爲奉湯藥侍寢興數歲猶一日及卒爲治喪葬曲盡其情凡其他所爲大槩類此故領袖教門垂五十年大小咸敬服無間言至正十五年冬十月丙申卒年七十有五弟子王君采先生二年卒於是君采之弟

子梁惟適及惟適之弟子王有大相與奉柩葬於觀之南岡是歲十有一月丁亥日也基年未弱冠時讀書栝城中聞紫虛山水之嘉因從數朋友往游之先生先生即束帶出與偕游過一所必指曰此某所此舊爲某所今爲某作於某人實某時無不詳且悉游畢登肴速觴主僕皆酣飫乃送至溪澗無毫忽怠慢意基後每與客往先生輒相待如初蓋是時鄉里之稱仁德長者莫不曰吳先生焉丙子之歲基宦游他方不獲復見先生今年春歸栝而先生已矣不亦傷哉於是葬已七月而惟適持世昌狀來請銘基既蒙先生知弗敢辭乃爲之銘銘曰

惟吳之先自周出弟兄來東開邑國支分蔓延綿厥陔長沙保民有功績河南治平爲第一前有季英後處默安棲蒿萊食水蘖聲華章章在文籍賢良代生莫具述豫章真人純孝德以扇渡水神輔翼公然飛升當白日於休先生發往蹟保合至真去污濁收藏精神歸閬寂金蛇守門邁皇極二六益一靈降質龍離于羊牝馬逸大衍之半返冲漠好溪南陵高以蔚少微四星光景接其上有松下有柏中有佳城錮以石地久天長保玄宅

吳孟思墓誌銘

至正十五年春三月濮陽吳孟思卒其冬十有一月翰林待

制致仕申屠公以子昭來泣拜于劉基已公乃代之言曰昭之先人以文學出入縉紳間縉紳之士揚名當世者無不與交游先生所知也今死而家無貲不能求名于大官請以屬先生基居杭時嘗與孟思游而善故不能讓而誌之曰君諱叡字孟思先世家濮陽譜亡莫詳其系六世祖忠仕宋爲殿前司統制官靖康之難從高宗南渡江始居杭州高祖允昌宋左武大夫忠州防禦使曾祖佐承信郎御前東庫使祖清成忠郎殿前都指揮使父埴以京官子弟恩授廸功郎至元十三年宋亡幼主歸命凡趙氏及其臣僚之子姪咸北覲京師廸功與焉畱十餘年復歸于杭配王氏生子三人孟思其

長也孟思少好學工翰墨尤精篆隸凡歷代古文欵識制度無不考究得其要妙下筆初若不經意而動合渠度識者謂吳子行先生趙文敏公不能過也故四方來求書者日衆出輒爲好事者邀止止或彌年月去則隨所至肩足摩躡孟思悉應接不倦孟思事父母甚孝母王氏先卒越二十有六年而父卒年八十有九家無恒產而喪葬咸得盡禮二弟皆仰給孟思孟思又好賓客樂周急故金帛日至而籩常無儲是歲以疾卒于崑山州之寓舍年五十有八歸葬于湖州武康縣之封禺山從先域也配徐氏先二十有四年卒至是而合葬焉子一人卽昭也孟思爲人外不與物忤而內甚剛介所

交多達官而略無求薦進意自號曰雲濤散人所著述有雲濤萃藁說文續釋集古印譜傳于世銘曰
孰成其名而不侈其齡維蒙弗冥以鑠厥貞有悠曷徵昭以斯銘

王子明墓誌銘

君諱坦字子明姓王氏其先會稽人由會稽徙括之麗水曰玉溪居焉故遂爲括人曾祖森祖祀父傑皆隱不仕守分務本以致蕃裕君貌峻整而心坦曩善居室州閭族人無不敬信能與人交時賢大夫如胡公汲仲趙公子昂李公仲賓皆相好讀書務知大義常曰士生不獲罪於親戚鄉黨使得自

娛于一丘一壑足矣寵榮權利非吾願也至正十五年九月日以疾卒年五十有九且卒命其子曰我家世儒者我死女當以時歛葬我母越禮母用釋道士以違聖人教且誣辱我配劉氏先四年卒年五十有七以某年某月日合葬于戴村先瑩之側子二人長曰琬其次曰瑾瑾早死君卒之明年君之從弟壘以琬來泣拜于劉基請銘其墓且曰吾兄有才學宜用世澤物乃闕不顯斯爲可憾基曰不然洪範稱人之福有五民鮮能兼也今君年六十不滿一不爲天有田宅以足衣食不爲貧守已而不惡於人不爲無德世治而生世亂而死生不見戈兵而死在正寢不爲不幸夫何憾乃爲之銘曰

生不勞其形而以善名死不離于否克全弗毀誰如其祉以
覃孫子

處州路教授吳府君夫人梁氏墓誌銘

夫人姓梁氏處州麗水縣人也五世祖汝嘉宋建炎初知常
州武進縣高宗南渡至常官吏皆散走公獨不去由是見知
升通判州事累遷戶部侍郎言金人難與和親及東京畱守
孟庾不可任用忤用事臣意進權戶部尚書而諷言者彈之
未幾金果背約孟庾以東京降如其言終寶文閣學士右通
議大夫致仕追贈少師爵縉雲郡公曾祖溱宋朝奉郎通判
平江府事祖梓父榮國好學有文值世變不仕母蔣氏宋文

林郎常德府龍陽縣丞昕之女也夫人年二十八嫁爲今將
仕郎處州路教授吳君虎孫妻吳君先卒卒後二十年是爲
至正九年而夫人以其年九月壬戌卒年八十十月己酉祔
葬于教授君之墓墓在青田縣鳴鶴鄉之釋山子男二人長
士弘次士毅士毅早卒女二人長亦早卒次適葉詵孫男三
人支生本生棣生女二人夫人能讀書每暇日必召子孫立
堂下講經史大義疊疊不倦故其子若孫皆讀書爲儒者銘
曰

維梁之先因國爲姓叔魚師孔侯封千乘統守九江竦著七
序政旣可稱言亦有緒伯鸞清節文貞純孝賢良代生可則

可效侃侃夫人少師之孫載其靜壹以配儒門儒門有秩淑人是宜兢兢婦道媿媿母儀孝慈旣修壽考以寧詩書之訓子孫是承擇山之原其土孔阜旣妥厥靈必大乃後

陳處士墓誌銘

處士姓陳氏名莘字希尹世爲處州麗水縣之來儀鄉人曾祖某祖某父某皆守分樂善以繼承其家業故世以德稱于州里至處士而家益裕行益謹推餘濟急雖數不吝邑舊有通濟堰溉四鄉民田幾二千頃遇旱澇壅泄必先出已資倡事皇慶癸丑水壞堤數十丈鄉人大戚處士竭力冒寒暑董役三年乃完蓋未嘗矜其勞焉至順庚午某月某日卒年六

十有一其卒之日月又其生之月日也娶葉氏後十有五年卒年七十有一至正癸巳四月丙辰合葬于其鄉吳院之原子男四人女一人孫男九人曾孫男十人可謂昌盛蕃衍有後也已銘曰

旣羸旣寧胡爲乎公卿位不酬其履多而孫子克緝乃祉垂于萬祀

陳司戶墓誌銘

故宋平江府司戶叅軍陳公以有元至元三十一年二月癸亥卒葬于麗水縣和樂鄉太平里曰浯溪大養之山至正十七年郡人季仁壽始撫其世系行事以爲狀而青田劉基爲

之誌及銘其誌曰陳氏上世居光州固始縣唐兵部侍郎勲始遷福唐其子孫再世仕閩遂畱爲閩人至宋有諱敘者幼以孝聞人稱之曰孝童及長有學行累徵不起敘生岳州教授報報生湖南運使承累贈金紫光祿大夫位特進公高祖也是始居龍泉爲處州人是生右儒林郎長沙縣丞輝長沙生左承節郎江東總領所幹辦公事堉堉生鏗官左宣教郎兩浙西路安撫使司主管書寫機宜文字公父也公諱浩一諱汶字養浩少孤母夫人葉氏親課之讀書比長通易春秋百家子史知天文曆數之學寶祐丙辰以祖澤補將仕郎趙葵馬光祖交薦授錢塘尉不就景定辛酉呂文德制置荆湖

辟權鄂州司理咸淳辛未陳仲微薦除紹興文學官俱不就後四年甲戌銓授廸功郎平江府司戶叅軍時潛說友安撫浙西疆起之未幾以印氏殺人事忤賈丞相遂解歸鄉里卒年五十有一夫人潘氏葉夫人後司戶十六年卒而夫人奉養克盡孝道子男四人長椿從仕郎汀州路總管府知事次梓卿次相卿出爲叔父後次松卿早世女二人長適將仕郎廣東道肅政廉訪司照磨潘弼孫男二人襲杭州路豐衍倉大使燦處州路醫學錄曾孫男四人女三人其銘曰昔周大姬女胡公祀虞侯封于陳宛丘是都其後子孫爲齊楚大夫因國立氏實蕃實膚閱秦漢魏晉宋齊以祖勲庸德言代有

不虛霸先開梁王于南隅涉隋唐宋支分蔓敷有自光徙閩
來宅栝區踵屬班聯爲卿爲儒歷世滿五是維司戶未及成
人而失所怙服膺母訓不憚勤苦博貫經史蜚聲庠序而弗
競弗求篤信好古薦辟數不就違母所參軍小試匪溺簪
組不悖法以附勢權臣是忤拂衣長辭歸臥鄉土遂自龍泉
移家城府韜光履素和樂詡詡隣有赤子貧弗能舉我呼俾
鞠之卒續厥緒里有墓廬爲強暴奪取我資俾直之爰復乃
宇姻巨室乏嗣請後勿與曰鬼不歆異姓敢餒而祖父惟歿
先厥母痛摧肝腑幸有子有孫克承克敘俾母壽以康如子
與處浯溪之旁其原膺膺其兆孔安其澤孔溥立石鐫銘百

世猶覩

處州分元帥府同知副都元帥石末公德政碑頌

至正十六年季春月九日子自杭歸至處處父老率其子弟
遮道言分元帥府同知副都元帥石末公政德曰往微公吾
聚已爲墟今微公吾屬已爲莖生我者天而活我者公君其
知乎予曰然如父老言夏五月豪酋旣來納欵父老又率其
子弟造于庭言曰石末公邦家之干城庶民之父母也父母
鞠子罔不殫厥誠厥子雖冥亦鮮不念覆育恩亶由中惟公
有大造于我州肆我民誕軫恤于心曰曷以報公願繪公像
于祠且勒石紀公功用示于州人子子孫孫俾勿忘請爲之

文子謝弗能父老進曰君以丞相命布宣天子德威既協于遠人旌庸錄勳當不憚爲石末公惠安我民不伐不矜君實知之鑒于庶言式克有徵達丞相心以勸後人時惟至公予弗敢辭乃敘其實而繼以文謹按公姓石末氏名某舊爲契丹人其先御史大夫以黑軍助大祖皇帝開國滅金爲大勳臣有傳在史官四世祖昭毅大將軍事世祖皇帝受命南伐克襄樊有功定爵三品爲沿海萬戶佩虎符鎮處發由是居江南好讀書工文章元統中襲爵鎮守處州大得軍民心居數歲以爵讓于弟而退處天台中至正十二年福建妖賊入處之龍泉處發大震憲司趣起公領征討事公至龍泉募

鄉兵擊賊走之未幾賊復入慶元公進屯查田使人購其徒爲應賊遂撓敗公乘勝掩擊俘斬千計遂復慶元進攻建寧之松溪政和皆克之處州平公乃還歸天台十四年海賊復叛行省憲司又以副元帥起公分府台州公辭不得已乃命鄉民作保伍團結扼要害使賊不敢輒登岸乃聚糧訓兵以圖進討其夏六月朝廷用舊議立巡海道官所以防賊賊乃復請降帥其屬往衛漕運至京師而妖人黃草堂復扇動黃崖民以報讐爲名聚衆構亂公以計收其渠酋六人斬之餘黨皆散爲民台州平行省又檄公分府處州時處之屬縣皆有賊松陽遂昌在上游去郡最近冬十月公帥師進討至寶

定而黃壇賊大出焚民居火照山谷公分兵守寶定自將麾下還城而賊已薄河津欲渡先是沿海軍悉發往江東城中畱者不滿數百人又大半老弱公夜部分居民丁壯出拒戰斬不用命者三人衆乃齊奮賊止不敢渡時沿海軍有自江東逃歸者六十餘人公召謂曰女輩能破賊吾當原女罪皆拜曰諾卽遣渡水擊賊賊敗走明日退去處州舊有城後壞不修遺趾蕪沒無捍蔽故百姓尤恟懼會縉雲人又叛從賊焚發之永康及台之仙居於是處州四面戒嚴乃議浚湟築城而官倉庫盡空晝夜經畫勸勉商賈大家和集其小民俾効力輸貲咸從無違審勢相方商工度材公悉親之官吏左

右無容私焉由是雖勞而無怨者義兵部長吳成帥衆討縉雲賊中途不進乃大掠民財以歸謀亂城中公測知其意卽召與計事縛斬之併捕其黨則皆授兵給號將作矣民大驚以爲神十有二月公所募義士合擊松陽賊大破之殺其首餘衆乞降松陽遂昌悉平今予以行省檄與公同議招輯事比至而公處置已各得其當因悉遵公行於是七縣豪酋相繼納款公之力也人謂公生太平時與縉紳爲文墨交游彬彬然儒者也及其臨遇事變則智勇奮發運不失機撫循士民則仁慈豈弟惠無不及可謂有用之奇才矣觀其鎮一州未及朞月而功效若是使得制方面專且久盜賊何足平哉

予既敬公德又重父老請於是述輿情而頌之美既往以期將來也頌曰

維木在山愈久彌長維德在人愈遠彌光公載世勳來鎮有方佩符桓桓出師洸洸謀先鬼神雷行電翔旌旗所指百怪走藏旣剪我棘爰固我疆風雨我廬公樹之墻雪霜我膚公被之裳晨昏起居婦拜兒踰有聚弗睽公賜溥將民愚而靈群祝孔祥祝公于天錫公壽昌如川源源如岳嶂嶂於千億年悠哉勿忘

連珠

擬連珠六十八首

蓋聞空谷來風谷不與風期而風自至深山固木山不與木約而木自生是故福不可徼德盛則集功不可幸人歸則成蓋聞志大業者必擇所任抱大器者必擇所投是以梁江湖不取螭殘之水鈎鯨鯢不適雨盈之溝

蓋聞急雨之漲可以決山及其息也得坻則止怒馬之奔可以超壑及其憊也歷坎而瘖是以長平之威報在鉅鹿會稽之勝終于姑蘓

蓋聞身無恒守勢窮則屈心無定主情急則親是以失時之言每多謙已墮井之呼不暇擇人

蓋聞石不亂玉惟瑊功爲能亂玉梟不混鳳惟鷙爲能混

鳳故妖聲冶色君子遠之必嚴偽行辯言聖人懲之必痛
蓋聞鑒能照物翳之以塵則不可照水能澣物滄之以泥則
不可澣故身明明斯可以使人明明政緩緩不可以責人緩
緩

蓋聞神龍未雲沕淵淪而無悶凡魚得水罟罟而莫知是
故聖哲識時以遠悔吝愚蒙競利以冒傾危

蓋聞物無全材適用爲可材無棄用擇可惟長故一目之人
可使視準五毒之石可使潰瘍是以穰苴治師智勇貪愚咸
宜其任公輸構厦棟梁枅稅各得其良

蓋聞神龍可參而不能使之去水飛黃可駕而不能使之捕
狸是故舍人之能而強之以其所不能則叛奪人之好而遺
之以其不好則離

蓋聞民情本質文過則僞人道本直慮佚則傾是故聖人制
禮因自然之序哲士用智利不息之貞

蓋聞觀形于聲未必見形求實于名未必得實是故飄風不
可以調宮商巧婦不可以爲家室

蓋聞物有甘苦嘗之者識道有彘險履之者知是以宴安日
久詰戎兵而聽者忽忽老成人喪語典刑而聞者啞啞

蓋聞物無專美用之者貴人有異欲諧之者從故冠纓不可
以服鹿而鞮鞜不可以馭龍是以合抱之松無庸於擘人之

國若甕之繭見棄於裸體之邦

蓋聞千斤之象不憚虎而憚鼠三寸之蝎不蠹棘而蠹松是以制必取其所畏防必究其所容故能不震而威于斧鉞不勞而固于垣墉

蓋聞國不自富民足則富君不自彊士多則彊故媚嫉之人庸則士隱而君獨培克之吏進則民彘而國傷

蓋聞春原之草拔盡復生夏厨之蠅驅去還集故時未至不可以彊爭勢方來不可以力戢是以善撲火者不迎其烟善防水者不當其急

蓋聞萬物並育不齊其用而各有用五氣迭運不同其功而

皆成功故良珠夜光不假燄于明燭秋華發彩不爭榮於春風

蓋聞魚無定止淵深則歸鳥無定棲林茂則赴故以道養賢則四方之民聽聲而來以德養民則四方之賢望風而慕

蓋聞剔大蠹者木必鑿去大姦者國必傷是故剖腹澣腸不如無病决躡解腕不若豫防

蓋聞日月勞其軀而寒暑成君相勞其心而天地位是故省衣旰食大舜所以致其憂手胼足胝神禹所以忘其貴

蓋聞仁暴殊途非暴無以爲仁之啓怨恩異路非怨無以爲恩之資是以赤日流金嘉樹之陰穆若玄冰裂石春陽之德

照如

蓋聞制萬變者在乎專察萬微者在乎定故衆輻寄身于一轂而衆物納形于一鏡是以人心無貳而鬼神不違王言如綸而兆民悉聽

蓋聞勢有所格則小柔可以服大力形有所格則大猛不能破小堅是故食人之虎不能吞一蝟牽羊之綆可以御九犍蓋聞太陽未升燭火與流螢並照繁霜未降薜花與小草同妍是以蛟蜃之市不可以稱有國稊稗之秋不可以言有年蓋聞冬華之木春不必實早慧之子年不必壽故良工鑄金忌其踴冶智士懷材貴乎藏秀

蓋聞植善傾惡天道之定好安惡危人性之常是以順天之道則人歸而王逆人之性則天怒而亡故伐罪弔民而周祚延于孫子興徭樹怨而秦禍發于蕭牆

蓋聞拂雲之松生于一豆之實聳壑之魚穿于一絲之溜是以忽細事者禍必盈輕小敵者亡必驟

蓋聞善賈者不壅其貨善治者不壅其民故政壅則奸生于國氣壅則瘍生於身是以山澤不壅而雨暘時若天地不壅而人物皆春

蓋聞大明普照鼯鼠惡其眯目毒霧揚氛蝮蛇喜其得時是以堯舜至仁而三苗不服桀紂極惡而多罪皆歸

蓋聞執駭馬者不與並逐救危舟者不與同誼是故止鬪而平其氣則爭可息聽訟而平其心則事不冤

蓋聞剪紙爲牆不可止暴搏沙爲餅不可療饑故妯娌之言終非實惠僕僕之拜徒爾多儀

蓋聞時有未至非力所及情有未孚非言可親是以見疑之璞三獻而取則足不鳴之鳥三年而後驚人

蓋聞人非大聖鮮有全材君欲任賢當如用器惟能避短而庸長乃克奏功而濟事是故驕驕駟以之運磨不若蹇驢之能干將莫耶以之刈草不若鈞鎌之利

蓋聞俗有厚薄運有廢興故去僞就真者盛之兆捨實徇華

者衰之徵是以豔舞妖歌末世所好奇技淫巧先王所懲

蓋聞理亂絲者必凝其志治亂國者在定其趨是故三軍一心劍閣可以攻拔四馬齊足孟門可以長驅

蓋聞能盈而不能謙者雖成必隳知進而不知止者雖得必失是故附贏以升高而枯蝨蝮以任重而躓

蓋聞百塵之市不畜噬犬八家之井不畜觝牛是故士有悍婦則良友不至國有妬臣則賢士不留

蓋聞蛭蟻之藪神龍不棲蒿菝之區嘉穀不值故秦庭虎視而芝歌逸響于商山周嶧鳥鳴而紫氣流光于西極

蓋聞物有準則心爲權衡非定靜之有素必紛拏而起爭是

故坐舟視星當察其曷轉執斗較斛當審其孰平

蓋聞奔馬之輪拳石礙之而格迅川之水束草投之則凝是以一星見變能使九服同災一脉爽和能使百體俱病

蓋聞淵之深者流必緩聲之大者響必悠是故政以漸成則民不駭俗以漸變則功不偷

蓋聞植嘉穀必以糞壤鑄洪鍾必以土型故物無必賤而賤不可輕是以海納汚然後成其大君納衆然後保其榮

蓋聞大器非一人之私大事非獨力所建是故利不及衆所以起天下之爭爵不求賢所以萃天下之怨

蓋聞心有所憂當徹於事事有所害當慎於爲故愚人畏病而常病智士防危而不危

蓋聞驕者誥之招故諂集而賢路塞暴者貪之使故暴用而怨府開是以榮彛操軸而若神之嚴棄社稷以如莽來革秉權而如燬之室與珠玉以同灰

蓋聞明鏡照膽不啓隴廉之顏長劍柱頤不稱佻僥之服是以狂歌之士遺世若草萊茹芝之老比身如鴻鵠

蓋聞嗜有所專則姦從而入長有所屬則惑由之生故徇功利者不虞誣詐溺鬼神者獨覺形聲

蓋聞暴於物者衆志之所誅妨於衆者輿情之所疾是以虎狼墮弇仁者見之而不憐枳棘當道行者過之而必詰

蓋聞截牛之角而呼爲豕則雖庸必駭染鷺之毛而指爲鴉則雖愚必疑故欺心之言祇足以招天下之怪掩耳之噪適足以致天下之嗤

蓋聞甘雨祈祈不起斷根之木長風烈烈難行折舵之舟故渭濱星殞孔明力殫于興漢洛都鼎震葺弘志屈于扶周

蓋聞天不掩賢而神人之道不睽君不忌言則上下之情無蔽是故周史陳詩而八百其年秦令禁語而一二其世

蓋聞天下有道則貴者勞而賤者佚天下無道則貴者佚而賤者勞是以弼亮惟寅而萬姓協睦姻婭廡仕而四方繹騷蓋聞無輿馬者不耻徒步無魚肉者不厭菜羹故性爲欲汨

則亂心爲物動則爭是以絕外交則可以守淡泊專內視則可以全淳精

蓋聞虎之躍也必伏乃厲鵠之舉也必拊乃高是故學必潛心然後可以有得藝能時習然後不爲徒勞

蓋聞龍涎螺甲以臭爲香苦鹵酸梅用爽作味是以五氣交感善調則收駿功五材相成善用則獲美利

蓋聞穴蟻不知飄風巢鳥不知湧溜是故閹閹之子患不識稼穡之艱難山林之士患不識禮法之去就

蓋聞方石不可以爲磨直木不可以爲輪故至情有時而當隱正論有時而不陳是以明彛利貞箕子以之處已危行言

孫尼父以之誨人

蓋聞大烹不以有鼎鶩而棄釜鬻大祭不以有犧牲而遺羈
醢是故馬服將趙而破秦用許歷之言子房佐漢而勝楚由
董公之啓

蓋聞夔屈求伸非終於屈龍潛或躍匪固于潛是故勾踐事
吳乃成姑蘓之舉夷吾佐霸曷問檻車之嫌

蓋聞陰陽之用道妙所憑剛柔之變鬼神所蟄故陽有闔而
陰有開剛可潰而柔可立是以玄冥凜冽而水結成冰赤熛
熿炎而金流爲汁

蓋聞以殺止殺聖人之不得已以暴易暴悍夫之無所成故
收野倒戈而三軍之役不再陰陵失路而百戰之功盡傾

蓋聞知風莫過於老駝識路莫逾於老馬是以家有老僕則
故物不委諸途國有老臣則舊章不求之野

蓋聞道有窮通非智可勝名有得喪非力可成故無願乎外
不必其身之絕謗無求於物不必其言之果行

蓋聞譎不可恃人覺則窮僞不可長情見而極是以剪綵爲
葩不可以受風雨畫布爲函不可以當戈戟

蓋聞侏儻之舌可習而變矇瞍之目難滌而明故教可行於
質近而道難化乎性成是以御龍之智不能訓猿以禮神農
之聖不能服豕而耕

蓋聞有形之器欲虛惟虛則可以納理無形之理欲實惟實則可以充器是故性無不誠然後能主一心心無不明然後能應萬事

蓋聞救天下之紛紛者不拘細故成天下之亶亶者不矜小功是故剗爛肉不爲利刃貫髀體不爲良弓

蓋聞積倉之家獨喜凶歲舞法之吏不樂清朝故民由此困而俗由此澆是以去奢尚儉明君所以弭邪侈澄心省事哲王所以清煩囂

太師誠意伯劉文成公集卷之七終

太師誠意伯劉文成公集卷之八

東嘉裔孫歲貢生標孤嶼元奇重梓

賦

述志賦

鮮余生之眇眇兮荷后皇之深仁具五氣以成形兮受明命而爲人體乾坤之粹精兮晞日月之景光漱飛泉之華滋兮浥灑露之醇英製杜蘅以爲衣兮藉萑若之菲菲佩琳瑯之玲瓏兮帶文藻之葳蕤朝濯髮于蘭池兮夕偃息乎瓊苑願馳騫以遠遊兮及白日之未晚駕輕軺之將將兮服蒼虬之駢駢遵大路以周流兮曳虹蜺之委蛇挾長離而棄鷓兮欸

閭闔之九門豐隆爲余先導兮百靈爲余駿奔前燭陰以啓
途兮颺凱風使清埃覲北斗于文昌兮朝玉皇于帝臺食玄
圃之丹萸兮澡天潢之芳津激微焱于桂枝兮輕波起而龍
鱗清都不可以久留兮忽乘雲而遐征浮江湖之浩漾兮陵
山嶽之崢嶸野莽蒼以多榛兮路險隘而紆曲猥偷息然而
攫噬兮蝮蛇蜿蜒以當陸鬱忡忡以怵惕兮適皇皇以營營
雨淫淫而不止兮霧黯黯以晝冥烏鳶號以成群兮鳳孤棲
而無所楚屈原之獨醒兮衆皆以之爲咎欲振迅以高舉兮
無六翮以奮飛將抑志以從俗兮非余心之所怡長太息以
增歎兮哀時世之異常棄韶夏而非聽兮登傑休于中堂茅

軒于以和羹兮腌鮑魚而實俎斲榎楠以給爨兮束荆棘而
爲柱施罾麗于丘陵兮怨魴鯉之弗獲虎兕逸于山林兮循
戶庭以求索前蒙眛以指途兮疆楊子使操轅命侏儒令舉
晁兮別都盧使守閹歲冉冉而將頽兮日曖曖以就昧松柏
摧而根死兮江河化而爲澮秣余馬于不周兮整余轡於樊
桐無著龜以決疑兮迷不知余所從搏扶搖以爲輿兮攬列
缺以爲輶駟青鸞之芟芟兮超烟靄而上浮梁天津以濟河
兮睇紫微之神闕開明怒目而電視兮貔豹吼而山裂進無
人以爲之先容兮欲自獻而不敢氣勃鬱以憑中兮心惻傷
以惜慄過少微而歷明堂兮就軒轅而陳情雷霆砰其隱嶙

兮馬辟易而不行訪六符于泰階兮求民極之所在咎繇不
可以作兮競狂直以爲罪凌天街以徑度兮造旬始而瞻西
清衆畏讒而卷舌兮孰能白予之忠誠怙悻其無止兮默悄
悄以狐疑要傳說于箕尾兮命靈龜使占之曰有名必有實
兮若形影之相因相福極出自天兮又何尤乎世之人鼎胡
峙而不烹兮旗胡張而弗麾弧不可以射侯兮駟不可以策
而馳衆蠕蠕以朶頤兮若頽波之東趨謂翬翟爲弗章兮愛
羸豕之負塗方不可刈而規兮白不可涅而黑悲桂椒之芬
芳兮與朝菌而偕落殷比干之剖心兮時豈不知其爲聖人
魯仲尼之過化兮焉役役而無所容其身由彊義而罹殃兮

惠直道而被黜子胥忠而殞命兮伯夷清而不食將登山而
迷路兮欲涉水而無航東西南北安所之兮顧焉擇其所長
神冥冥而不下兮龜又厭而弗告思糾結而不抽兮意恍惚
以震悼忽濫汜以遐舉兮行遊目於大荒羲和不可扳而雷
兮恐年歲之弗將駕廣漠而南征兮叫重華于九疑山岑岑
以蔽天兮江淼淼而不可窺邇吾道夫西陲兮聽鳴鳳于岐
陽慨永黍之離離兮梧桐摧而不生浮龍門以沂河兮訪夏
后之遺跡川瀆混而不分兮鯨鯢起而人立攬駢轡而廻鶩
兮謁陶唐之舊京無衣裳以禦寒兮哀蟋蟀之悲鳴心悵悵
以增傷兮神夢夢其若醉淚落落以交流兮憂湛湛而來會

詩意什文集
傳說之版築兮無武丁其誰舉夷吾不逢夫鮑叔兮竟淪沒
于囹圄推竭心以服勤兮上介山而立枯種霸越而滅吳兮
終刎頸于屬鏹樂毅升于金臺兮何遁逃而走趙周條侯之
耿介兮卒含怨以餓餒忠有蔽而不昭兮道有塞而不行名
不可彊而立兮功不可期而成李斯上書以相秦兮空自陷
於罪尤買臣顯而僇辱兮豈如負薪之無憂魚赴餌以中鈎
兮雉慕媒而鷹鏑鳳凰翔于丹穴兮又何患乎矰弋返余旆
之旖旎兮還余車之嶙嶙采薇蕨于山阿兮擷芹藻于水濱
列玄泉以瑩心兮坐素石以怡情聆嚶鳴之悅豫兮翫卉木
之敷榮挹清風之泠泠兮照秋月之娟娟登高丘以詠歌兮

聊逍遙以永年

弔諸葛武侯賦

天地閉塞兮聖賢隱淪大旱焦土兮龍無所用其神當運命
之厄窮兮堯舜且猶有極委厥軀以隨化兮亦哲人之所戚
彼狂猾之縱悖兮履羿莽以滔天亂倫汨典兮流毒爲淵夏
少康之不作兮時又無湯與武蕨薇不可以食兮焉裊裊而
獨處睠三顧之疑惴兮躡高光之所爲鳳凰非梧桐不棲兮
于嗟去此其安歸瞻星芒于渭濱兮豈皇天之叛渙日昃不
可使再中兮指桓靈而慨歎昔尼父之不逢兮寓斧鉞于春
秋誅姦邪於旣死兮開日月之昧幽般紛紛以攘奪兮世不

以之爲殃民彘泯滅猶一髮兮微斯人其孰明覽出師之遺
表兮涕滢滢其如雨悲逝者之不同兮邈英風于萬古

弔祖豫州賦

汙池汀滸兮蛙黽樂之大鵬天遊兮燕雀謂女奚爲狐狸冠
裳兮梟獍堂宇支離節疏兮側身無所嗚呼將軍兮管葛之
倫遭逢庸愚兮有志莫伸委棄九鼎兮烹飪瓦釜截梁爲杙
兮束椽爲柱偃背泰山兮依倚培塿圭璋砥砮兮沙礫瓊玖
山陵暴骨兮社稷黍離故臣酸嘶兮行人涕洟臥薪嘗膽兮
此維時矣宣光不作兮吁其悲矣烏號之徹札兮無養由以
操之驂騑不逢伯樂兮與駑駘而並馳系曰龍嘘而雲兮夫

豈不能自翔鴻鶴舉翮而千里兮又何必懷此鄉魚遊思故
淵兮鳥棲思故林吾固知將軍之不忍兮惜庸夫之無心日
曖曖以西傾兮時靡靡而就逝雁鶩群而喋呷兮鸞鳳反爲
所制世治亂之有數兮天亦無如之何也匪將軍之不能兮
惜不幸而逢此時也死有重於泰山兮繫生民之休戚吾獨
悲夫將軍兮仰玄穹而太息

弔岳將軍賦

木之顛兮其根必傷人之將死兮命扁以爲不祥嗚呼將軍
夫何爲哉天地易位兮江河倒流鳳凰天殤兮豺狼冕旒臣
不知有其君兮子不知其有父嗚呼將軍兮獨銜冤而懷苦

讐何愛而可親兮忠何辜而可戮父見且猶不顧兮何忠良
之能有臣竭心以爲主兮又何可以爲仇也天之所廢不可
植兮亦將軍之尤也烏傷弓而欲殞兮群啞啞而拊翼猿狖
糜于機檻兮羈悲鳴而不食相伊人之有心兮曾鳥獸之不
如忘戴天之夫耻兮安峻宇而高居信讒邪之矯枉兮委九
廟于狐狸甘卑辭以臣妾兮苟殘喘以娛嬉焚舟楫于洪流
兮烹驂騶于中路庸夫亦知其至愚兮羗獨迷而弗寤捐薄
軀以報主兮乃忠臣之素心縱狂瞽之弗思兮又何必以之
爲禽屈原貞而見逐兮伍子忠而獲戾固將軍之不辰兮哀
中原之蕪穢弔孤墳于湖濱兮見思陵之牛羊寄遙情于悲
歌兮識忘親之不臧

弔秦不華元帥賦

世有作忠以致怨兮曾不知其故然懷先生之耿介兮遭時
命之可憐上壅蔽而不昭兮下貪婪而不貞權不能以自制
兮謀不能以獨成進欲陳而無階兮退欲往而無路忠沉沉
而不白兮心搖搖而不固繫乘黃服鼓車兮駮蹇驢以曳之
胥猛虎于籠檻兮狐狸群而制之衆刻木之枉直兮信讒邪
之流言倒裳以爲衣兮涅素以爲玄前宕冥令指途兮驅離
婁使從之教養由以彎弧兮繫其肘而引之吁嗟先生兮何
逢時之不辰生不能遂其心兮死又抑而不伸姦何爲而可

長兮忠何爲而可尤尸比干而獎惡來兮白日爲之昧幽重
曰嗚呼哀哉吾安歸乎楔倫升堂兮騶虞以爲妖殪鳳凰而
斲麒麟兮糜梁肉以養梟吠狗遭烹兮捕猫蒙醢雄鷄晨鳴
兮衆以爲罪忠固不求人知兮於先生其何傷國有忠而不
知兮喟皇天之不祥辭曰莽莽崇丘聞無人兮天高聽遐疏
不得親兮松柏挫折荆棘長兮軒于菜蔬充佩纒兮浮雲虹
蜺紛縱橫兮上下阻隔幽不能明兮嗟若先生卒罹殃兮姦
邪矯枉歸罪愆兮咎絲不作誰與平兮跖犬噬堯理則然兮
麒麟豺狼不同群兮自古有之吾又何嗟兮

伐寄生賦

并序

余山居樹群木嘉果駢植人事錯迕斤斧不修野鳥棲息
糞其上茁異類日夕滋長舊本就悴余覩而悲之乃募趨
捷腰斧鑿升其巔剝條剔根聚其遺而燔之於是老榦挺
立新萑濯如若瘡瘍脫身大姦去國斧鉞之時用大矣哉
作伐寄生賦

天生五材兮資土而成汝獨何爲兮附麗以生疣贅蛭嘍兮
枝牽蔓縈瘠人以肥己兮偷以長榮狀似小人之竊據兮謂
城社之可憑觀其陰不庇物材匪中器華不羞于凡筵實不
諧於五味來烏烏之喙聒集垂豸以刺蚝果被之而實萎卉
蒙之而本悴壇杏無所容其芬芳甘棠曷能成其蔽芾亶無

庸而有害矧睚隤之可置爾乃建修竿升木末運斤生風以
翦以伐脫纏牽於喬竦落纖韮之騷屑剗蘚膚以除根斲去
毒而刮骨於是巨蠹旣斃新莢載蕃迎春而碧葉雲滃望秋
而碩果星繁信知斧鉞之神用寧能裕蠱以生患也耶嗟夫
農植嘉穀惡草是芟物猶如此人何以堪獨不聞夫三桓競
爽魯君如寄田氏厚施姜陳易位大賈入秦栢翳以亡園謀
旣售芊化爲黃蠹憑木以槁木姦憑國以盜國鬼居育而人
殞梟寄巢而母食堅冰戒乎履霜羸豕防其躅躑諒前轍之
昭昭何人心之自惑故曰非其種者鋤而去之信斯言之可
則

通天臺賦

昔漢武帝元封二年作通天莖臺于雲陽亦一時之奇觀
也相如已死無能賦者乃擬而爲之其辭曰

惟漢五世握乾統坤三十有二載文教赤乎有截威武振乎
八裔於是乎萬方來同四藝嚮風靡民不寧無神不宗天子
乃駕六龍乘輕雷訪王子于緱山邀安期於東萊泰山封兮
碣石開宣防塞兮萬福來乃立通天之莖臺延列仙于太虛
運巧思于孫卿發脫卒于溫舒景壅土之高明得軒轅之闕
丘役六丁以孱功鑿坤輿以承趺下刻峭以削成兮上辨華
而紛敷屹屹兮似不周之天柱挺挺兮若閭風之瑤圃蠹鴻

濛以建標兮拖甘泉以爲祛日月縈繞於中央兮雷霆鬱律
而在下俯太微之連珠兮見華嶽其如馬雲霧起于太空兮
激倒景而成虹攀帝車而陟三階兮平步閣道而入紫宮建
畢昴以爲梁兮繚銀河以爲帶覽九州于一目兮游氛卻而
清氣會爾乃命方士集玉童脯文麟炙輕鴻揚太一之靈旗
撞碧玉之華鍾萬舞波動百神景從奏承雲兮發咸池獻三
嬪兮矯兩龍合六律兮齊八佾美要妙兮靈感通樂具九奏
神交五精紅光下垂燁如流星歛霍揮忽電掣而焱集兮皓
皜瞭晶天輝而日晶方象載之樛流兮伏燭陰以承衡蜚陳
寶使先軀兮曳旄頭以爲旌織阿舒徐而按節兮飛廉游揚

而不驚於是萬姓盱盱使者肅肅竽籟戢音鳥獸跼伏風攬
縱以扶輪兮雲霏霏而蒙轂爾乃鏗蒲牢舉神燿聲砰隱于
穹窿兮燎烟煜以燭漢於是乘輿乃升竹宮展嚴禋老聃相
禮后夔正倫張九光之華鐙列羽葆以行陳登降有數拜起
有秩八神雍穆而順序千官端儼其如一精誠交孚上下不
二祀事既虔天瑞乃至泰山宵呼白雲晝媚露落仙掌芝生
洞房灑銅盤以如飴擢九莖而夜光蓬萊致如瓜之棗玄洲
獻不死之香神策周而復始與天地同久長於是天子乃翬
然而思湛然而疑曰予否德曷致休徵將天以民爲子而王
者代天以理苟能以天心爲心天胡爲而不喜往者南征北

伐東狩西巡雖曰順天以行道能不運衆而勞民乃命謁者
省四方賑貧窮察饑荒寒者與之衣餒者周其糧六宮罷文
繡之飾上林閑射獵之場老羸無負戴之勞幼穉絕天殫之
傷亘天所覆莫不熙熙皞皞戴帝德於虞唐也遂作頌曰
於玉臺兮赫通天不日成之黔走先燁綿綿兮穆土亥太一
貺兮輝光員拜竹宮兮熙恪虔蕃祉衍兮德澤宣人神和兮
皇億年

龍虎臺賦至順癸酉會試作

龍虎臺去京師相遠百里在居庸關之南右接太行之東
地勢高平如臺背山而面水每歲車駕行幸上都往還駐

蹕之地以其有龍盤

虎

踞之形故名耳

猗歟太行之山呀雲豁霧結元氣而左蟠於赫龍虎之臺摩
乾軋坤魁群由而獨尊其背崔嵬突律森岡巒而拱衛其勢
則崑崙駸駸仰星辰之可捫白虎敦圉而踞峙蒼龍蜿蜒而
屈盤狀昂首以奮角恍飈興而雲屯其北望則居庸截臬烟
光翠結攢峰列戟斷崖立鐵峻鳥飛而不度古木樛以相掣
其下視則漲海沖融飛波洗空風帆浪舶往來莫窮想瀛洲
之密邇睇三山之可通彼呼雁戲馬適足彰其陋而眺蟾望
岸曷足逞其雄豈若茲臺之不事乎版築而靡一作勞乎土
功也想其欽岑碣磈曼衍迤邐形高勢平背山面水巨靈獻

其幽秘歸邪護其光晷何嵩華之足吞豈岱宗之可擬此所以通光道于上都揭神京之外壘匪松喬之敢登羗乘輿之攸止也至若四黃旣駕鹵簿旣齊方玉車之萬乘蔚翠華之萋萋載雲罕與九游光彩絢乎虹電山祇執警以廣道屏號灑雨以清埃朝發軔于清都夕駐蹕於斯臺明四日以遐覽沛仁澤於九垓眇軒轅之梁甫屑神禹之會稽雄千古之盛典又何數乎方壺與蓬萊慨愚生之多幸際希世之聖明雖未獲覩斯臺之壯觀敢不慕乎頌聲遂作頌曰

傑彼神臺在京之郊金城內阻靈關外包上倚天視下鎮地軸大行爲臂滄海爲腹崇臺峩峩虎以踞之群山籠從龍以翼之於鑠帝德與臺無窮於隆神臺與天斯同崇臺有偉鸞駕爰止天子萬年以介遐祉

騷

九歎九首

秋風起兮夕露溥浮雲沉陰兮白日晝寒木葉落兮水泉乾孤雁鳴兮悽以酸攬余轡兮悵盤桓野蕭條兮行路難豺狼驕兮狐兔頑蘭蕙死兮荆棘蕃我欲奮飛兮無羽翰援雅琴兮發哀彈絃斷絕兮涕洟瀾

我髮種種兮颯如其稀我心依依兮忽若有遺過吾不能改兮德吾不能知往者不可悔兮來者不可期進無益于世兮

退將安歸嗚呼已矣兮吾寧不悲

天有田兮不可以耕山有龜兮不可以知咎徵剡蒿以爲梁
兮削菌以居楹匠石卻走兮工垂拊膺登高望遠兮觀四瀛
水東流兮日西傾般紛紛兮各有營我獨展轉兮從夜達明
風飄飄兮揚塵野寂寞兮無人舟何爲兮山阿車何爲兮水
濱北望楚兮東望秦倒江河兮亂星辰天門窈窕兮重九闈
願有言兮遠莫陳虎豹颯颯兮爲喜爲瞑橫流涕兮瞻蒼旻
心馮噫兮不能伸麋有角兮龍有鱗空山寂寥兮吾誰與隣
江無舟兮河無梁隰有荆棘兮而無稻梁鷹化鳩兮雀變隼
狸爲貍兮龍爲蚓睠長顧兮情紆軫九疑高兮禹穴幽梧桐

枯兮鳳不留山木悽悽兮叫鴝鵒鴻鵠飛兮無所投雲杳杳
兮雨悠悠孰懷情兮知此愁

虎厭肉兮騶虞苦饑獺升堂兮麒麟受羈黃葵薦滌兮章甫
承綦簡韶屏棄兮絃筦兜離指玉以爲石兮削方以爲規天
不可問兮神不可咨繫彼之是兮而此之非有樗在林兮有
櫟在趙著龜孔昭兮勿遠余思

今夕何夕兮天宇清步逍遙兮仰觀列星河漢皎兮北斗橫
悲風發兮候虫鳴林鳥起兮沙鶻驚長夜寥寥兮何人哭聲
愴悵恨兮不忍聽回身入房兮淚沾纓蛟虬偃蹇兮豺虎寧
弧無弦兮車說其衡知不可慮兮誰女令蹇淹留兮難爲情

履霜思裘兮燠則棄之臨河號舟兮濟而置之不網胡魚兮
不弋胡鵠剪雉杞梓兮索灌莽以取木捕猫乳鼠兮僉以爲
仁吠狗宵警兮行者怒瞋彈鸞養梟兮莫知其咎斲冰以承
宮兮曷云能久長太息兮有所思林木動兮巢鳥悲山有藿
兮園有葵心懷君兮君不知
秋天沈澀兮百草黃螿蛄悲吟兮朝榮有芳屣履起兮獨彷徨
心悠悠兮懷故鄉原有粟兮隰有禾桂花紅兮蘭紫芽涼
風動兮松柏馨流潦落兮水泉清蔬可茹兮秫可酒集鄉里
兮會親友坐白石兮蔭蒼筠翫明月兮思古人魚鼈淵兮狐
首丘終余生兮安所求

秋日慘淡

秋日慘淡兮秋風其颺白露旣下兮繁霜繼之蘗離其根兮
葉脫其枝辛者黝顏兮柔者就萎登高望遠兮涕泗滂沱松
柏稀少兮蒲柳何多露不盈條兮霜晨以晞歲晏玄冰兮知
將奈何

思歸引

山高高兮可以望四荒胡躋爾顛兮而不見我故鄉歲云莫
兮無衣裳車罷馬羸兮僕夫頓僵水有蛟鱔兮陸有虎狼于
嗟奈何兮惟懷永傷

松筠軒歌

謝靈運文集
彼松之高兮矯吾以其操兮此竹之節兮耿吾以其潔兮露
溥溥兮宵明烟霏霏兮曉清風聲我琴兮鳴鶴我笙溜胡爲
兮我衣塵胡爲兮我纓颺兮颺兮竊以幽騷青鸞兮服蒼虬
吾與元氣兮升降與雲霞兮綢繆逍遙兮相羊終吾生兮樂
以忘憂

漁父歌

江之水兮悠悠深有鱣鯉兮淺有鯿與儵檣爲楫兮松爲舟
其釣伊緡兮人誰女尤江之水兮娟娟蒹葭吟風兮楊柳含
烟有鮪在宥兮有魴在淵其釣伊絲兮人誰女愆江之水兮
浪浪泳之沄沄兮浮之洋洋有魚與鰕兮可釣以網無遐爾

思兮人誰女傷

麥舟圖歌

我馬飽粟兮彼食不選秕糠我麥滿舟兮彼無以送其死亡
我忽見兮哀不能忘推以與之兮我心乃康我聞在昔兮有
虞夏商一夫百畝兮家有稻與梁生不餓殍兮死有藏嗚呼
今不得見兮使我傷心

山陰王景回友樵齋辭

稻梁離離兮稂莠騶騶不可以偶狼兮鳳不可以侶梟求
羊無人兮鍾子寂寥哀風鬻發兮原野蕭條四顧彷徨兮憂
心且焦若有人兮在山椒攜糧負薪兮嘯歌以遨黜陟無聞

兮寵辱不搖嗚呼吾爾群兮去無待子招臨流泉兮倚逍遙
無斤我松兮無使柏也凋

柳橋漁唱二首爲黃中立作

春風淡淡兮湖水波柳乘橋兮青烟滿莎扣子舷兮發長歌
靡白蘋兮亂駕鷺前有蛟兮後有鼉予往予還兮吁予奈何
彼湖有波兮此橋有柳我維我舟兮聊以搔我首放歌逍遙
兮哀莫予偶有籜在曾兮有沙在籥逝者滔滔兮羌不可以
久綠蘋兮菲菲落花兮點衣江無津兮海無涯嗚呼寂寥兮
吾與誰歸

獲麟操

有獸維麟兮獵者獲之折肢毀膚兮曾不如鹿與麋嗚呼哀
哉兮爾何生于此時周公已矣兮吾能不悲

在陳操

彼山有楊兮彼隰有柳彼路斯何兮孔棘且阻玄雲杳冥兮
不日以雨重華寂寥兮誰與晤語茫茫九州兮孰爲予所龜
蒙無人兮駕予歸處

白雲歌爲良上人作

用貞上人以白雲隱居名其舍蓋取諸唐狄公之言以寓
其思親之意枯蒼劉基爲之歌曰

青山兮翠微白雲兮孤飛悵遊子兮遠于離不如雲兮倏往

而躡白雲兮容與青山兮欲雨懷予親兮在雲之下雲兮雲兮歸予從女

秋山圖歌

秋風起兮蕭蕭望青山兮寂寥水泠泠兮出石葉槭槭兮辭
條氣悽悽兮就寒夜耿耿兮不朝鳳凰兮安之梧桐兮早凋
思美人兮隔江河玄雲冥兮天路遙託宵夢兮遠徂征欵扶
桑兮倚逍遙盼青雛兮不來愴悵恨兮魂屢飄願乘風兮絕
浮雲要洪崖兮訪子喬高無梯兮深無航鼃鼃陸梁兮虎豹
驕歸來兮歸來紫芝有蕘兮黃精有苗

梁孝子廬墓詞

并序

梁君天民思其父母而廬于墓將終身焉夫廬墓非古禮也然人子之情有不能已而自我爲之君子不非焉或乃狀其景物而詠歌之則悖於禮而非孝子之本心矣故爲之作楚語使梁君聞之必愀然悲曰他人有心予忖度之夫子之謂也不其庶乎其詞曰

陟彼岵兮望父陟彼屺兮望母若儀容兮在前恍音聲兮在後陟彼屺兮望母陟彼岵兮望父愴悵惘兮無聞心搖搖兮愁苦聞空廬兮山之巔朝松有嵐兮暮蘿有烟其下維地兮其上維天食思寢思兮以日以年嗚呼魂乎其有知兮矢相從於九泉

送龍門子入仙華山辭 并序

龍門先生既辭辟命將去入仙華山爲道士而達官有邀止之者予弱冠嬰疾習懶不能事嘗愛老氏清淨亦欲作道士未遂聞先生之言則大喜因歌以速其行先生行吾亦從此往矣他日道成爲列仙無相忘也其辭曰

青山崔嵬兮烟雲杳冥回溪鬱紆兮巖谷晦明修篁雜樹兮相蔽虧洞壑窈窕兮人不知清猿警夜兮雀報晨花開鳥啼兮長如春隰有芷兮陵有茗美人不來兮山寂寥瓊芝兮玉華丹萸兮翠葩紫葛兮黃精礪礪兮鬚髮蜚梁連蜷兮登降刻施幽溇閔礪兮敞晃譎詭芳蘭桂椒兮或紅或紫松風澗

泉兮金石盈耳梧桐萋萋兮竹實葢葢鳳凰翔鳴兮五色卉焯望美人兮翠微空山寂寥兮遲爾來歸霓爲衣兮霞爲裳飲沆瀣兮食瑤漿晞正陽兮澡淪陰精神完兮毛髮香握六符兮躡九靈被裔雲兮歌洞章御扶搖兮欵天門詣北斗兮覲虛皇超鴻濛兮軼希夷造無始兮逍遙娛召秦女兮吹簫使湘娥兮彈絃洪崖嘯歌兮王母啓齒萬舞齊進兮襟佩颯纒長離前驅兮鸞鳥爲使蒼龍駢駢兮白虎牙牙雷公磅礴兮列缺旭旭登明堂兮絕河津上閤道兮攀勾陳過三危兮繞玄冥出太微兮入西清憇牛渚兮泛靈槎乘回飈兮以還家美人兮歸來山中兮其樂無涯

王彥中哀辭

王氏二子者故宋給事中信之世孫也長曰鍾字彥中
次曰錡字彥和是同母一乳而生二子焉及長俱好學能
文詞至正癸巳其長以春秋經魁鄉貢次榜行省銓授建
德路學錄未幾以力學得疾至丁酉四月卒鄉人咸痛惜
之蓋期其成而不意止于斯也其弟悲哭不能自勝於是
元帥石末公聞之爲詩以弔且唁而劉基爲文以哀之其

辭曰

朝出兮雁行暮歸兮相將聯綵服兮上高堂棣華茂兮親樂
康忽秋霜兮夏零淒風發兮凋紫荊同氣兩身兮一死一生

單隻其輪兮嗟何以行窈窕兮悒悒想形容兮不可尋飲泣
兮吞聲恐慈親兮傷心俯重泉兮永隔掩此哀兮何極盡禮
事生兮恪恭子職是謂孝友兮死者瞑目

太師誠意伯劉文成公集卷之八終

太師誠意伯劉文成公集卷之九

東嘉裔孫歲貢生標孤嶼元奇重梓



古樂府

艾如張

有苑者林衆鳥萃之我欲張羅榛楛翳之旣礪我斧又飭我
徒孰是奧穢而不剪除爰升于虛以相乃麓有條我綱載秩
我目有鳥有鳥五采其章嚙嚙啣啣率彼高岡張之弗獲憂
心且傷寤寐懷思曷云能忘有鳥五采亦旣來止昭其德音
以相君子君子豈弟其儀是若艾而張矣云胡不樂

芳樹

蔚彼芳樹生于蘭池景風晝拂榮泉夜滋燁如其光炫于朱
曦含華吐芬嚶鳴滿枝君子有酒以遨以嬉羽觴交橫吹竹
彈絲相彼草木允惟厥時良辰易徂能不懷思沛其邁矣其
誰女悲

上陵

零雨霏霏亦降于桑愴悵中懷念昔先皇惟昔先皇創業孔
艱寤寐興懷能不永歎精靈安所體魄焉依幽明隔絕曷已
其思堂堂梓宮在彼高岡霜露是萃能不慨傷禮起由情將
情繫物溥斯索矣庶其罔闕郊社既虔宗廟孔威上陵是申
式昭孝思

將進酒

有酒湛湛亦盈于觴酌言進之思心洋洋亦有兄弟在天一
方安得致之樂以徜徉有酒在尊既旨且清何以酌之有觥
其觥豈不欲飲惜無友生愴悵傷懷曷云其平兄弟之合如
墳如篋朋友既比如綱如維死喪急難是責是庇今日有酒
如何勿思人亦有言解憂惟酒載懽載嘏亦孔之咎我觴維
瓊我聿維玖以樂兄弟以宴朋友

上之回

上之回六龍矯捷光耀拂鷺鳥轡石關匝棠梨揚靈旗縣月
支天馬來宛居劄穆上立釐穰穰坐明堂朝萬方翕披離玉

燭光於億年樂未央

朱鷺

朱鷺來玉山巔
頽翁引燦臆
延朱鷺來
滄流轂飲赤水食丹砂
朱鷺來
炎德加威
昆明滇焚訛
朱鷺來
集太液帝錫祐
荒廣斥朱鷺來
燁煌煌挾鷓鴣
媒鳳凰
朱鷺來
皇之輝神筴演
無窮期

巫山高

巫山高哉鬱崔嵬
下有江漢浮天回
深林日月照不到
洞谷闔闔生風雷
危峰半出赤道上
落日猿狖鳴聲哀
虎牙赤甲鬪雄壯
風氣以之而隔閼
楚王遺跡安在哉
俱見麋鹿跳蒿

萊當時忠臣放澤畔
乃與靳尚相徘徊
山中妖狐老不死
化作婦女蓮花腮
潛形譎跡託夢寐
變幻涕淚成瓊瑰
神靈震怒不可禱
雲霧慘淡昏陽臺
猛風吹雨洗不盡
假手秦炬歎飛灰
精誠感應各以類
世間妖孽匪自來
君不見商王夢中
得良弼傳巖之美
今安匹巫山何事
近楚宮終古怨恨
流無窮

戰城南

朝戰城南門暮戰城北郭
殺氣高衝白日昏
劍光直射旄頭落
聖人以五服限
彘夏射獵耕織各自安
土風胡爲彼狂不自顧
而與大國爭長
雄高帝定天下遺此平城
憂陛下宵旰

不逞食擁旄仗鉞臣不羞登南城望北土雲茫茫土膻膻
尤禡牙雷擊鼓舉長戟揮天狼休屠日逐渾邪王
連馬羊橐駝載金人照耀紅日光逍遙而來歸帝鄉
帝鄉樂熙熙際天所覆罔不來小臣獻凱未央殿陛下
垂拱安無爲

君馬黃

君馬黃我馬驪二馬八足爭驅馳回頭顧影雙驕嘶
尾端散作蘋虹飛黃馬曜日黃金晶驪馬謂是玄天
精眼前好醜那能明吾聞良驥稱以德不聞矜此驪
黃色世無伯樂識者誰有德無色空自知

思悲翁

弱齡轉日月邁景想神仙願往諒無及待來徒自憐
黃金棄砂礫劬心鍊丹鉛鑿石不得水沉劍徒窺淵
流光不我與白髮盈華顛杖策出門去十步九不前
歸來對妻子塵竈午未烟午時乏計策退畊無園田
霜蒲怨青松逝矢恨驚弦已矣復何道吞聲赴黃泉

聖人出

聖人出臨萬方赤若白日登扶桑陰靈韜精星滅芒
群氛辟易歸大荒曖曖寒谷熙春陽枯根發茁暢幽藏
潛魚躍波谷鳥翔花明草暖青天长聖人壽北斗軒轅
調氣候北

詞意什文集
辰中居環列宿八風應律九歌奏圓方交格神靈轉聖人出
陽道開億萬年歌康哉

釣竿

斫竹作釣竿抽繭作釣絲滄洲日暖波漣漪綠蒲茸柳葉
垂鈎纖餌香魚不知石鱗激水溪毛動玉燕迴翔竿尾重大
魚入餌腮頰紅小魚卻放淵法中更祝小魚知我意長逝深
潭莫貪餌

思美人

雨欲來風蕭蕭披桂枝拂陵苕繁英隕鮮葉飄揚烟埃靡招
搖激房帷發綺綃中髮膚慙寂寥思美人隔青霄水渺茫山

岩堯雲中鳥何翛翛欲寄書天路遙東逝川不可邀芳蘭花
日夜凋掩瑤琴閑玉簫魂裊裊心搖搖望明月歌且謠聊道
遙永今宵

關山月

關山月明風惻惻萬里黃雲雜沙磧夜深羌笛吹一聲征人
相看淚沾臆古人以綏服奮武衛耕戰守禦不外求何人倡
此戍邊策千載以貽中國憂關山月圓復缺何忍年年照離
別願得馳光照明主莫遣邊人望鄉苦

楚妃歎

江漢揚波六千里上有巫山蠱天起錦衾一夕夢行雲萬戶

詞意集
千門冷如水聞道秦兵下武關君王畱連猶未還山深不見
章臺殿泪羅冤淚空潺湲尚憶前王好馳逐宮中美人不食
肉回狂倖誓須臾間至今相業歸孫叔楚宮無復如昔人况
有神女如花新悲來恨新還憶故誰能斷卻巫山路

上清詞三首

王子晉好吹笙吹得神仙下玉京一朝羽化隨風去回首故
宮芳草生

天上月影悠悠似鏡看看又似鈎自是嫦娥甘寂寞桂花相
對度千秋

河漢水九秋清涼月滿空聞雁聲雁聲不到夢先到白露濕

衣天未明

漢宮曲

小雨如烟晝掩扉捲簾忽見燕雙飛不知春色能多少總向
昭陽柳上歸

江上曲八首

數樹垂楊綠水邊問郎何不繫蘭船浦沙新漲青山遠半夜
月明無杜鵑

曾記樓船夜泊時家家絃管鬪腰肢于今絃管歸何處結束
枯蒲當酒旗

昨夜月明天似水今晨月落水如天天長水遠人何處蘆葦

蕭蕭一抹烟

紫桂香銷五夜霜
碧雲收盡玉蟾光
琅玕不是人間樹
何處朝陽有鳳凰

月出前山青黛寒
雁聲遙下碧雲端
草根錯認驪珠吐
自是西風白露團

賓雁來時月滿洲
于今雁去月如鈞
雁來雁去何時了
月照離人又白頭

憶見垂楊總綠絲
陡看秋菊映疎籬
柳花作絮隨風去
菊綻金葩欲似誰

紅蓼丹楓一色秋
楚雲吳水共悠悠
人間萬事西風過
惟有

滄江日夜流

寒夜謠二首

良夜悠悠星河滿
天風吹窸檣聲如管絃
無酒可飲寒不能
眠枯腸饑鳴百慮交
煎人生一世不滿百年
寤寐懷思曷維其然
內省不疚有愧聖賢

今夕何夕歲聿其徂
草木凋落山川縈紆
瞻彼鴻雁拂翼天
衢離離和鳴載悠
載徐雖無羽翰心與之
俱華月出雲青
鏡在隅歌以寫懷云
何其吁

夜夜曲

冬夜恒苦長夏夜恒苦
短短長相蔽虧殷勤望
推挽紉茅作

詞意何文集
繩繩易斷汲水作池池易旱故鏡塵昏難遠照故衣絮敝無
新暖西風嫋嫋吹桂枝白露點苔黃葉滿

秋夜曲

木落霜露繁烏啼夜方永起行望明月西風吹雁影雁飛一
何急烏啼安所集徘徊不能寐望月空佇立佇立河漢傾誰
家砧杵聲關山渺千里何處不傷情

長歌續短歌

短歌調促情苦悲長歌引愁無絕期短聲欲盡長聲續似是
荆山人泣玉悲哉荆山泣玉人但知貴玉不貴身縱令哭盡
歌堪聽何異春花委路塵古稱悲歌可當哭傷心如中金石

鏃更不必聽蔡琰笳又何必聽漸離筑長歌飄揚徹九天短
歌嗚咽入九泉徒言歌哭兩情異誰知歌聲尤可憐

墻頭花

墻頭花紅錦妬美人抱瑟倚高樓只恐花飛逐風去熒熒絳
臘送殘宵燕語鶯啼斜日暮

望行人

朝聽乾鵲鳴暮見燈花結鵲鳴燈結無定期鏡裏青雲看成
雪人生百歲難長保天上孤鸞海中老滔滔逝水不回西灼
灼秋花幾時好一朝復一朝一夕復一夕只恐君心念妾時
妾身已作山頭石

長松梢

長松梢青拂天歲暮商飈急寒苦令人憐陰崖有樸楸生在
荆棘下霜凋荆棘葉網綴如簷瓦春風破冰凍勁綠不曾赭
禍福相倚伏豈不在所招寧爲樸楸莖莫作長松梢

折楊柳

東風二月春如酒不見百花惟見柳柳絲縮烟畱暝鴉柳花
蕩漾逃羲和美人捲簾看不足柳色萋萋妬娥綠夜來微雨
清郊圻鶯黃相應鳴塤篴欲寄柔條無信使空將淚染回文
字

王子喬

王子喬乃是髭王之子皇王之孫深宮洞房不稱意卻駕白
鶴尋軒轅虹蜺爲旆雲爲旛飄然乘風上崑崙王子喬去何
之朝發暘谷暮崦嵫六龍九鳳相追隨穆王西上不得王母
訣胡爲元氣獨爾私王子喬去不還后稷功業委如山猶有
九鼎知神姦王城日夕生茆菅爾獨胡爲白雲間王子喬空
長歎

走馬引

天冥冥雲濛濛當天白日中貫虹壯士拔劍出門去手提仇
頭擲草中擲草中血漉漉追兵夜至深谷伏精誠感天天心
辰太一乃遣天馬從天來揮霍雷電揚風埃壯士呼天馬馳

橫行白晝吏不敢窺戴天之耻自古有必報天地亦與相扶
持夫差徒能不忘而報越棲於會稽又縱之始知壯士獨無
媿曾莊嵇紹何以爲人爲

結交行

朋友以義合久要貴不忘結交或匪人騶虞化爲狼君不見
市井人盃酒忽相得傾肝瀉膽無所惜一朝需求不稱意口
裏驅蛩心上蚝更聞背語觸疑心墻角車輪亦生翅君不見
耳與餘又不見田與竇當其得意時刎頸以相就寧知嫌隙
反掌成坐令襜席生戈兵古人重結交晏子真其人任文執
誼羊豕之合死生棄置安足陳

梁甫吟

誰謂秋月明蔽之不必一尺翳誰謂江水清淆之不必一斗
泥人情旦暮有翻覆平地倏忽成山谿君不見桓公相仲父
豎刁終亂齊秦穆信逢孫遂違百里奚赤符天子明見萬里
外乃以薏苡爲文犀停婚仆碑何震怒青天白日生虹蜺明
良際會有如此而况童角不辨粟與稊外間皇父申豔妻馬
角突兀連牝鷄以聰爲聾狂作聖顛倒衣裳行蒺藜屈原懷
沙子胥棄魍魅叫嘯風淒淒梁甫吟悲以悽岐山竹實日稀
少鳳皇憔悴將安棲

春日行

詩意集
自日出東陸垂光曜中天大哉至陽德蕩蕩無頗偏坐令慘
烈化滋潤頃刻枯槁回鮮妍聖人法天道神化叅玄微春朝
著典禮上下同光暉垂衣向明物自育帝力皞皞無人知春
天和春日麗但願宇宙長如春聖明天子千萬歲

牆上難爲趨行

弱水不可以航石林不可以車人生貴守分牆上難爲趨茫
茫八極內狹徑交通衢紛紛皆轍迹擾擾論錙銖焦原詫齊
踵龍頷夸探珠片言取卿相盃酒興剪屠機事一朝露妻子
化爲魚林間有一士蓬蒿翳窮廬種稻十數畝種桑八九株
有酒且飲之無事卽安居孰知五鼎食聊保百年軀悠悠身

後事汲汲復何如

少年行

駿馬狐白裘玉勒黃金羈賓從如浮雲顧盼生光輝朝驅紫
陌塵暮醉青樓姬但見花月好寧知霜雪飛在苒世途異淒
涼瑤草衰園田皆易主親友盡睽違學書時旣晚躬稼力已
微歲晏寒風生倚牆聽隣機逝水不可挽枯蓬安所依佇立
爲爾歎感我淚沾衣

獨漉篇

獨漉復獨漉月明江水濁水濁迷龍魚月明復何如楚國皆
濁屈原獨清行吟澤畔哀哉不平上山采茶下山采藥心在

腹中何由可白豺狼在後虎豹在前四顧無人魂飛上天珠
玉委棄不如泥沙躡冠戴履萬古悲嗟

懊懺歌

白鴉養雛時夜夜啼達曙如何羽翼成各自東西去
昨夜霜風起入戶復吹帷兒啼母心酸母愁兒不知
養兒圖養老無兒生煩惱臨老不見兒不如無兒好
食藥苦在口食蓮苦在心苦心無人知苦口淚沾襟
男兒初生時蓬矢桑弧弓老大卻思家懊惱無終窮

王昭君

漢庭不賞微功士昭君卻向胡中死昭君辭漢入胡中胡女

悲愁漢嬪喜含情欲怨當語誰手彈琵琶淚沾衣掖庭望幸
從此絕巫山有路他生歸殷勤說與上林雁好在明年再相
見漢恩如海長自深妾自生來命如綫賤妾一身何足惜可
惜當年劉敬策遂令上策重和親欲倚紅顏清塞塵只恐妾
身先草露漢宮無復如花人

塘上行

塘上何所有有蒲與荷花蒲花難開荷易落使我歎恨長咨
嗟鴛鴦戲我後鷓鴣翔我前四顧不見人淚下如流泉浮萍
違淥井寄身滄江渚滄江不應竭是妾命如許朝淚灑玉臺
夕淚沾羅袞采荷得見蓮中復懷苦心廣筵列肴蔬好者卽

美味荼蓼有時甘
菘葵有時棄
巖風吹秋林
蕙蘭化爲草
於悒今可憎
芳菲故嘗好
行亦私自憐
坐亦私自憐
願爲天邊月
流影玉堦前

君子有所思

晨上龍首山
徘徊望咸京
交衢錯萬井
甲第連公卿
鞍馬相照曜
冠蓋如雲行
扈從金宮歸
賜酒銀甕盈
前庭列騶騎
後苑羅傾城
寵極妬心起
歡餘驕氣生
田竇巧相奪
蕭韓互摧傾
快意在一時
報復延戈兵
范雎掉柔舌
穰侯去疆嬴
寧知幽燕客
接踵夸雄鳴
茫茫前車轍
遺跡猶未平
胡爲不自悟
坐使憂患并
二疏獨何人
千載垂令名

上山采蘼蕪

上山采蘼蕪
山峻路迢遞
下山逢故夫
悲風生羅袂
憶昔結髮時
願得終百年
變故不可期
中道相棄捐
蓮實生水中
石榴生路側
未嘗掛齒牙
中心豈能識
上山采蘼蕪
羅袖生芳菲
因君贈新人
莫遣秋霜霏
落葉辭故枝
不寄別條上
白日無回光
誰能不惆悵

雙桐生空井

雙桐生空井
井空桐葉稀
葉稀不自蔽
鳳鳥將安歸
雙桐生空井
井空泥泉不出
桐根日夜枯
何由伐琴瑟

美女篇

南國有美女粲粲玉雪顏眉目豔華月色映清秋寒粉黛不敢浣佩服惟幽蘭一朝備選擇得廁金宮班真心耻自銜望幸良獨難况蒙衆女妬倩笑誰爲歡恒恐芳桂枝寂寞零露溥素手發瑤琴冷冷奏孤鸞宮商合要妙遺響風珊珊大音世罕識日暮空盤桓安得託宵夢集君瑤臺端相思不可極躑躅起長歎

玉階怨

長門燈下淚滴作玉階苔年年傍春雨一上苑墻來

秋思

梧桐生碧砌密葉暗金井驚心昨夜月照見棲禽影

長門怨

白露下玉除風清月如練坐看池上螢飛入昭陽殿

宛轉歌

星稀月白河闌干饑蟲顛號莎草寒美人望月歌宛轉瀟湘水碧蒼梧遠愁魂一夜不得歸化作斷雲天際飛

長相思

長相思在沅湘九疑之山鬱蒼蒼青天蕩蕩林木暗落日虎嘯風飛揚欲往從之水無航仲尼有德而不用孟軻竟死於齊梁松柏摧折桂生蠹但見荆棘如山長長相思斷人腸

雉子班

雉子班飛翛翛鳴嚶嚶踉蹌出沒灌莽中袞裳煥爛頰瞳瞭
野人拄翳潛置媒和聲相應無驚猜黃間一發激流電錦綉
披裂委草萊林棲野啄本無累嗜欲沉溺禍所胎君不見天
池鳳凰食竹實逍遙至和永終日

朗月行

朗月何朧朧照我綺牕中牕中美人不能寐起看玉宇生秋
風秋風飄飄吹木末纖雲卷盡懸明月明月隨風出海來海
水蕩漾龍鱗開寒光噴浸碧落外白浪湧作金銀臺何處悲
風怨羌管誰家舞榭笙簧暖長信宮中漏水長昭陽殿裏更
籌短漏長更短總含情開牕坐視河漢傾廣寒宮在何處欲

往從之渺烟霧青雛汗漫不可期桂花如雪東方曙

大牆上蒿行

牆上蒿方春擢秀何芄芄炎天六月旱無雨枝葉枯死隨飄
風世情翻覆不可擬人生有身莫依倚君不見樊將軍一朝
函首西入秦又不見劉越石仰天長歌握中璧三士自殘因
二桃子胥終棄吳江濤世人見機若不蚤何不看取牆上蒿

鷄鳴曲

日將出鷄先鳴千門萬戶聽鷄聲美人錦帳愁欲曙壯士苦
心煎百慮人間百年能幾日日日鷄鳴催日出一朝過了復
一朝白髮蕭蕭此生畢齊妃播淑德感彼蟲薨薨周宣恬姜

詩意何文集
后功業光中興亦知國家共如此莫怪鷄鳴催早起

邯鄲才人嫁爲厮養卒婦

邯鄲有才人豔色如朝霞嫁作厮養婦雲鬢埋泥沙憶昔趙
王全盛日夜夜綺筵張寶瑟中山美酒盈羽觴一笑黃金滿
千鎰繁華過眼如轉蓬故宮禾黍秋茫茫明珠白璧走函谷
墜簪遺珥空悲風人生最苦是衰老白首無歸向誰道蓀門
夜永月光寒臥聽鶯啼斃枯草

出塞

居延風高榆葉空狼烟夜照甘泉宮將軍授鉞虎士怒蚩尤
亘天旗尾紅麒麟前殿催賜酒已覺此身非已有猛氣遙將
日逐吞壯心肯落嫖姚後雁門城外沙如雪玉帳霜濃鐵衣
折長劍須披瀚海雲哀笳莫怨天邊月北風烈烈刁斗鳴回
看北斗南方明驚箭離弦車在坂不勒燕然終不返

入塞

狐裘蒙茸沙磧裏望見玉關驚且喜關門候吏記曾逢白髮
相看淚如水歸來放馬咸陽原舊遊今有幾人存斜陽慘淡
照籬落閑看隣翁戲子孫

孤兒行

蓬頭韞足誰家兒滿面塵埃雙淚垂爺娘棄我不待老骨肉
無人但兄嫂兩身一氣不相知陌路茫茫向誰道清晨采薪

目入歸殘羹冷飯難充饑欲言問兄兄不顧嫂是他人更奚
訴人生一世爲弟兒同根自合同枯榮命娘在日曾眷戀願
兄回看死人面

病婦行

夫妻結髮期百年何意中路相棄捐小兒未識死別苦啞啞
向人猶索乳箱中探出黃金珥付與孤兒買饗餌不辭瞑目
歸黃泥泉下常聞兒夜啼低聲語郎情不了願郎早娶憐兒
小

淮南王

淮南王好神仙澄心鍊炁守自然收拾真一歸中圓化爲五

色黃金丸乘風駕景飛上天飛上天逍遙遊八鸞捧轂龍翼
輶虹蜺繽紛夾綵旂上窺九陽下六幽回頭大笑武皇帝柏
梁桂館空清秋

蜀國弦

胡笳拍斷玄冰結湘靈曲終斑竹裂爲君更奏蜀國弦一彈
一聲飛上天蜀國周遭五千里峩眉岩岩連玉壘岷嶓出水
作大江地砮天浮戒南紀舒爲五色朝霞暉慘爲虎豹嗥陰
霹翁爲千嶂雲雨入噓爲百里雷霆飛白鹽雪消春水滿谷
鳥相呼錦城暖巴姬倚歌漢女和楊柳壓橋花纂纂銅梁翠
氣通青嶼碧鷄啼落天上星山都號風寡孤泣杜鵑嗚咽愁

幽冥商悲羽怒聽未了窮猿三聲巫峽曉瞿塘噴浪翻九淵
倒瀉流泉喧木杪樓頭仲宣羈旅客故鄉渺渺皆塵隔含悽
更聽蜀國音不待天明頭盡白

昔昔鹽

楊柳正萋萋門前碧草齊別離如昨日白髮滿春闈飄花兼
淚落行雲逐望迷綠苔凝屐跡粉汗浥書題夢到龍沙北魂
銷馬邑西卷簾雙燕入開鏡一鷲啼腸共吳江繞眉將楚岫
低攀枝憐並蒂窺沼妬雙棲躍水寧無劍通天亦有犀那看
明月夜登樓惑馬蹄

東飛伯勞歌

南飛鷓鴣北飛鵠黃昏鳴鷄白日燭珊瑚石上栽兔絲鴛鴦
獨宿枯桑枝永夜涼蟾入羅幕蟬翼不如秋鬢薄寒塘露蓮
千葉紅可憐零露空隨風

雙燕離

雙燕營巢時雙飛復雙語輕盈柳陌風振迅芹塘雨巢成近
繡幃雙宿更雙飛爲蒙主人愛不信有睽違四月溫風起榴
花發紅葢拾蟲還哺雛出入無停翫五月教雛飛繞巢舞烏
衣側避蛛絲過斜縈柳線歸六月雛翼老分飛各相保脉脉
傍珠簾依依集蘭繚世事有轉旋陵谷一朝遷昆明延劫火
甲第化歊烟帶睡驚飛出風沙兩相失死生不得知嬾婉從

詞意什文集
茲畢回看舊主人粉黛成灰塵天高塵渺渺海闊波鱗鱗在
苒朝還暮惻惻向何處毛凋半夜霜淚滴三春露露寒霜又
濃憔悴不成容同心諒難隔魂魄終相從

烏棲曲

霜華着樹成秋葢樹頭棲烏驚夜起起向幽閨啼數聲閨中
美人泣到明

吳宮烏啼夜已分宮中不聞人盡聞夜聲風落茱萸子沉沉
漏斷啼烏死

三洲曲

三洲洲上花柳春三洲浦裏多商人酒旗紅袖明江閣客船

只望洲邊泊

八月風吹洲上樹樓船卻向江西去紅粧送別各沾巾驚動
新來江北人

武陵深行

武陵溪一何深水有射工射人影陸有丹蛇長百尋嗟哉武
谿不可臨溪之水深且闊鳥不敢飛龍不敢越海氣連天日
月昏茵露着人肌肉裂嗚呼丈夫寧能沙場百戰死有骨莫
葬武谿水

遠如期

遠如期近別尚云可遠期能不悲憶昔辭君出門去手種庭

前松柏樹樹今成器人未歸洞房白髮秋霏霏高原有梧隰
有檜待君北邙山石下

大堤曲

大堤女兒顏如花大堤堤上無豪家東家女作西家婦夫能
棹船女沽酒春去秋來年復年生歌死哭長相守君不見襄
陽女兒嫁荊州撞鍾擊鼓烹肥牛樓船一去無回日紅淚空
隨江水流

明月子

朱閣綺疏瓊作戶明月照人秋獨苦桂花吹冷眠不成誰家
高樓絃管聲倚樓空望別離處唯有清光自來去月圓正好

缺復催人生見月能幾回

短歌行

來日苦短去日苦長日長不自覺日短令人傷君不見望後
月又不見霜中盡清光縱好魄已虧芳心欲動根先死少年
不知老可悲衰老卻憶少年時

長安道

長安道送盡芳菲到枯槁人生衰盛苦不常何異長安道傍
草漢家將軍初拜官門前上客車班班一朝世衰烟燄歇車
輪無聲馬蹄絕明年有詔封冠軍依舊車馬來如雲

隴頭水

隴頭水征夫淚征夫之淚滴隴頭化爲水入秦川
秦川嗚咽嗚不已何因得天風吹入君王耳

秋宵吟

玄蟬催秋入湘簾芙蓉露浴胭脂淡銅烏吻水添夜長碧草
斂愁歸寒蟹羅帳無人五更雨梧桐驚啼白楊語春光爛熳
不得知霜露淒涼奈何汝

車遙遙

車遙遙馬竭竭不知何人始作車長與人間載離別回風吹
起羅帳塵低頭恨殺作車人

陽春歌

帝車東指淑景昭冶容冉冉生寒條枯根相顧一時起陽春
只在霜雪裏枝頭候禽鳴滑滑暖烟日夜催花發蜂喧蝶競
方及時風雨宿昔成離披人間但見陽春好未識春陽有枯
槁

鳴雁行

嚙嚙鳴雁鳴達旦舉翼相連拂雲漢平原漠漠生野烟雁飛
只向江南天江南十月多禾黍一半輸官半供汝明年二月
歸養雛雛成又望江南去

獨不見

暖烟漾春林色紫膩雨摧紅出花蓋蝶飛撩亂燕飛輕嚶鳴

詞意任文集
相應俱有情有人抱瑟上高閣坐對粧臺彈別雀曲終顧影
還徘徊東風自吹羅帳開

梅花落

種梅長江邊歲晚花始發東風爲愛桃與李卻使孤芳坐銷
歇美人高樓深紫霞捲簾一見長嘆嗟世間有榮卽有悴君
不見海中碧樹終無花

折楊柳

去年送君楊柳青暖風晴日花冥冥今日思君瑣窓綠柳條
又綴黃金粟君心卻似條上花隨風飄蕩不思家妾心已作
科上槁縱得春光爲誰好折取長條寄遠人人生四十無青

春

秋夜月

秋夜月黃金波照人哭照人歌人哭月長好月缺月圓
人自老

棗下何纂纂行

棗初作花時纂纂臨路岐八月棗成實纍纍耀朝日棗花纂
纂蜂蝶翻棗實纍纍人滿園嚴風蕭瑟枯葉飛蜂蝶不來人
亦稀

白苧詞二首

鏗華鍾伐靈鼓青娥彈絲白苧舞文竿迎風雉振羽長袖奮

迅若雲舉博山霧合春濛濛玉缸搖火生長虹翠蕩紅翻如
暗夢中

暖香結暝嬌青春翠釵珠壓光照人鳳簫十二烟霧勻鴻驚
燕嬌波龍鱗玉觴交飛酒如沼門外斜陽在林杪宮中沉沉
天未曉

蛺蝶行

軟芳晞露春鮮妍上有蛺蝶飛翩翩暖風扶暝撲天起翠重
紅輕迷欲死東園無花畱不住相隨又過西園去沉沉斷夢
失韓憑卻抱霜華怨秋曙

鈞天樂

君不見天穆之山二千仞天帝所以觴百靈三嬪不下兩龍
去九歌九辨歸杳冥我忽乘雲夢輕舉身騎二虹臂六羽指
揮開明闕帝閔環佩泠泠曳風雨明月照我足倒影搖雲端
參差紫鸞笙響震瑤臺寒我欲聽之未敢前空中接引皆神
仙烟揮霧霍不可測翠葩金葉光相射鯨鍾虎箎鏗鴻濛撼
崑崙兮殷啞峒揚天桴兮伐河鼓咸池波兮析木風遂升泰
階朝玉帝側身俯伏當瓊陛訊曰太極拆裂爲乾坤紛紛枝
葉皆同根胡爲妄主水火金木土自使激搏相熬煎臣聞三
皇前群物咸熙熙衆子戴一父皞皞無偏私忽然元氣自蕩
滴變換白黑分賢癡蚩尤與黃帝從此興戈矛流毒萬萬古

誠意伯文集
爭奪無時休骨肉自殘帝心至仁能不憂帝不答臣心逃風
師咆哮虎豹怒銀漢洶湧天鷄啼颺輪撇捩三島過海水盡
是青玻璃神奔鬼怪惕驚起遺音泚泚猶在耳夢耶遊耶不
可知但見愁雲漠漠橫九疑

周小史

婉孌周小童冶容敵花紅鮮雲委綠髮明星炯雙瞳采蘭澧
水湄挾彈長陵東擲果閩春市卷衣嬌金宮流盼溢華彩言
笑生芳風常恐秋露零瑤草成衰蓬食桃坐翻覆倩笑徒爲
工繁華豈不好不知身所終吾聞濟川楫乃屬植鰭翁悠悠
萬世下德業光無窮

結襪子

昔有信陵君乃在大梁城親爲貴介弟位冠諸侯卿傾家待
國士倒屣延豪英詣門謁朱玄虛左上侯羸袖椎奪兵符救
趙蜚英聲河外走蒙騫宗社賴扶傾于今不可見寂寞傷人
情

拔蒲三首

拔蒲清川渚水淺蒲不長自非排風羽莫羨凌波
拔蒲江水湄終日不盈把嫌殺紫鴛鴦雙戲蒲葉下
拔蒲復拔蒲織作波紋簟無處寄相思秋風露蓮淡

從軍五更轉

一更戍鼓鳴市上斷人聲風吹鴻雁過憶弟復思兄
二更月上城照見兜鍪光側身望山川淚落百千行
三更悲風起樹上烏鵲鳴枕戈不能眠荷戈繞城行
四更城上寒刁斗鳴不歇披衣出戶視太白光如月
五更星斗稀霜葉光爛爛健兒爭先起拂拭寶刀看

前有尊酒行

前有尊酒芳以飴舉杯欲飲且置之丈夫有志可帥氣胡爲
受此麴蘖欺禹惡旨酒而玄德上達桀作酒池而南巢是蔡
商辛惡來以白日爲夜糟丘肉林相枕藉瑤臺倏忽成灰塵
流毒猶且遷殷民夫差酌而納施楚國酣而放屈姑蘓臺上

麋鹿遊鄢郢宮中狐兔出灌夫罵坐禍延魏其竹林稱賢神
州蒺藜亡家破國有如此酒有何好而嗜之前有尊酒醲以
清酌之白日成晦冥眼花耳熱亂言語元氣耗斃肝膽傾乃
知酒是喪身物衛武之戒所以垂休聲

公無渡河

丈夫不愛死成仁心所安殞身苟無故哀哉徒自殘水能殺
人人共知公獨茫然狂以癡黃河渺渺無津涯乃欲絕流而
渡之公也溺死人誰悲世路如何險惡實多平地倏忽滔天
風波利溘欲餌孰知其佗不見不聞縱橫網羅固不必如公
之癡可堪以魚中之鉞亦不必如公之狂可禽以伏甲之觴

眼前言笑百媚出寧知兵刃羅心腸公無渡河河無津筮篔
一曲愁殺人

隔谷歌

戰鼓咽悲風弓折不可把弟兄隔谷不相聞咫尺人間與泉
下丈夫誓許國殺身非所憐兩心本一氣何能坐相捐登埤
四顧望慨慷肝膽裂不見救兵來但見繞城鐵甲光如雪飛
禽在羅罔尚或念其饑身為高官馬食粟忍見手足居重圍
相彼鴻與雁亦各顧匹儔挽弓射一猿群猿拔箭聲啾啾鳥
獸且有情人心獨何尤嗚呼田家紫荊雖微木不忍聽君歌
隔谷

步虛詞五首

太微啓靈宇紫殿含祥風圓光照無外梵炁來冲融仙人魚
鱗次羽葆朝當中離羅鬱蕭臺縹緲浮太蒙泰階平六符文
昌位三公北斗運元化軒轅成歲功稽首玉陛下逍遙樂無
窮

鬱華開赤殿結隣炫黃文葳蕤爛霄漢照耀下土墳東華蹕
嚴駕西崦泮昏氛神行肅疊疊象化陶醺醺景風調坎北玉
燭煥烟熅冥茫密勿間歛忽幽朗分萬靈仰無私九真告成
勲

重陽義寶闕衆星拱高垣寥寥太虛庭巍巍無極尊白虎伏

誠意伯文集
右駢青龍承左轅玄武後躩踞長離前騰騫黃靈正常居萬
有歸一元希微眇稊粟浩蕩彌乾坤高卑各奠位神化無窮
源

步虛歸太一精心覲樞庭浮浮回極運湛湛規中清五神謹
訶衛六位肅敕寧東溟升陽曜西海生陰靈炎光熈玄室湧
醴液朱陵駸駸粗穢除綿綿淳粹凝妙用無邊方攝身遊帝
青

焚香禮玄梵肅駕朝紫宸游雲結華蓋鮮飈翼飛輪披烟上
閣道佩月攀鉤陳服食丹霞漿嗽嚙甘露津琅琅歌洞章寂
感虛皇嘖飄颻廣莫風舒嘯青林春沆瀣六合外永與無始

隣

氣出唱

今日不樂振策遠遊東上泰山巍何修修道逢仙人要我同
仇蒸霞爲糧烹玉爲羞玄英素蕤光華蔓流日觀菡萏葩華
九州令我從之身輕若浮道以五鸞翼以兩虬朝翔玄圃夕
止蓬丘謁見王母雲眉月眸青娥三千或舞或謳風吹琅玕
聲如鳴球雜花並開莫知春秋洪崖先生勸我此畱自揣凡
骨非仙者儔七情交煎一觸百抽又病憊僻無藥可瘳崇崇
清宮蕩無涯輒列仙如沙不少一漚王母笑聽拜謝扣頭歸
來山林曷標曷鉤熙熙泰和長樂無憂

班婕妤

昭陽秋清月如練
笙歌嘈嘈夜開宴
長信宮中辭輦人
獨倚西風詠紈扇
傾城自古有褒姒
紅顏失寵何須怨
泠泠玉漏掩重門
一點金釭照書卷

神絃曲

紫桂飄香九萬里
三山地色如凝水
水妃骨冷不能眠
金簪素指敲冰絃
泠泠玉泉滴貝闕
閨壑發鮫泣
幽碧青瞳小髻歌
繁霜飛風起江低
昂瞳矐紫燄出海樹
天清月落空

相望

短歌行

涼風西來天氣清
雲飛水落山崢嶸
髮膚剝削稜骨生
鮮芳

菸悒成枯莖
百蟲哀號百竅鳴
凡有形色皆不平
成之孔艱壞厥輕
羈人含愁起夜行
列星滿天河漢橫
繁思攢心劇五兵
天高何由達其情
歸來託夢通精誠

長歌行

秋夜夜長月照軒
夢見天神與我言
曜靈循環周四垣
四時迭代成寒溫
枯榮生殺相爲根
我與萬物何怨恩
生丁其時命所存
六淫洶湧無鍵闔
由其弗約離其魂
春葩敷披夏實繁
外美中瘁誰能捫
風霜涸寒肅不騫
納華狀真歸本元
掃滌浮穢夫何冤
我今語女開女昏
生生殺殺無窮源
斂女貞蓄守女門
扶桑赫赫升朝暉

燕歌行

霜飛動地燕草凋沙飛石走天蕭條江河倒影陵谷搖白日
 慘淡晝為宵美人迢迢隔雲霄青冥無梯海無橋魚枯雁死
 星芒消沉沉思君不自憫愁如驚風鼓春潮歲云暮矣山寂
 寥梧桐葉落空乾條崑崙層城阻且遼蒼梧九疑烟霧遙瓊
 田瑤草芟荔莢江離澤蘭成艾蕭登高望遠肝肺焦安得羽
 翼搏長飈

江南弄七首

江南細水縑綺波江南綵女雛鳳歌疑嘖引睇紆青蛾紆青
 蛾舒窈窕網軒綉戶鎖嬌春不放村鷓來木杪

雄龍呼雌江底鳴山搖谷殷江波驚餘音不斷隨風征隨風
 征入湘竹截玉鑽星吹向天楚江六月無炎燠

湖波澄明月色鮮畫鷁相隨出采蓮嬌紅曼綠鬪春妍鬪春
 妍倚徘徊今朝花盡且歸去明日更有新花開

河曲懸匏滑濱竹碧鮮削出藍田玉輕翎參差飛羽謾飛羽
 謾幽簧含丹櫻瑤筍調清吹月明紫鳳來毵毵

采菱女子木蘭船翠裙紅袖青玉鈿搖光蕩影惜嬋娟惜嬋
 娟愁夕暉拔蒲歌斷鯉魚入歸去菱荷香滿衣

江草萋萋春渺渺江阜出遊多窈窕輕霞衣裳碧雲嫋碧雲
 嫋紅日斜鴛鴦飛過綠渚去東風吹落菖蒲花

詠意集
巫山蒼筤巫峽長瑤姬出舞朝雲翔翠葩嬈嬈金支光金支
光丹葉艷寶鷄爲使鳳爲驂去雨來風樂無極

步出夏門行

步出夏門遙望滄海九河茫茫碣石安在魚龍漉漉日月曛
藹三山何所弱水浼浼羲和曷往鼇極孰宰發鳩之羽其心
不改安期不死桃實可待悠哉沛乎歌以永慨

丹霞蔽日行

彤霞何煌煌蔽此白日色炎埃被九野照灼后土赤朱陵開
火府燼爛相蕩射山蒸絳紅氣川瀉丹砂液穹玄變光曜衆
草相烜赤迴迷河林舊高奪崑崙碧鬱華不能神跋烏已化

魄女媧在青天歲莫還鍊石

烏生八九子

樹上烏一生八九子相呼啞啞聒人耳何不學銜泥燕和鳴
集桃李又不學鷹與隼奮翅高飛碧雲裏胡爲巢此庭樹間
啄腐吞腥饕吻背少年挾彈如流星禍機潛發不見形翅翎
摧折身首磔螻螳傷殘誰女惜

猛虎行

君不見昔者牛哀病七日化作猛虎形躩踞衣裳佩帶換毛
尾棄置衽席眠茅茨怒牙出吻目閃電頃刻不識妻與兒昨
日燈前相笑語豈意今朝化爲虎嗚呼世上茫茫化虎人祇

應化心不化身

行路難二首

君不見水上漸往來倏忽隨波移又不見花上蜂東枝飄落
尋西枝世人食葵不食藥莫倚結交心匪石君不見避席武
安人卽是當年竇家客

君不見白日光不照幽草心又不見石上雲膚寸遂成陰世
間會合良難得况有巧言能燦金伏波豪塋魏碑仆當時豈
是非知音智謀啓疑忠逆耳平地反掌生崎嶇行路難愁最
深

太師誠意伯劉文成公集卷之九終

Blank page with a faint rectangular border and extremely light, illegible ghosting of text.

